



1004

9

12



///

Faint, illegible text or bleed-through is visible on the left page. The text appears to be arranged in vertical columns, possibly within a table or list structure. The characters are too light to transcribe accurately.

The right page is mostly blank, showing signs of aging, including yellowing, foxing, and some minor tears or damage along the edges. There is no legible text on this page.

進遼史表

開府儀同三司上柱國錄軍國重事中書右丞相監
修國史領經筵事臣脫脫言竊惟天文莫驗於璣衡
人文莫證於簡策人主監天象之休咎則必察乎璣
衡之精監人事之得失則必考乎簡策之信是以二
者所掌俱有太史之稱然天道幽而難知人情顯而
易見動靜者吉凶之兆敬怠者興亡之機史臣雖述
前代之設施大意有助人君之鑑戒遼自唐季基于
朔方造邦本席於干戈致治能資於黼黻敬天尊祖
而出入必祭親仁善鄰而和戰以宜南府治民北府

治兵春狩省耕秋狩省斂吏課每嚴於芻牧歲饑屢
賜乎田租至若觀市赦罪則昭合六典之規臨軒策
士則恪遵三歲之制享國二百一十九載政刑日舉
品式備具蓋有足尚者焉迨夫子孫失御上下離心
驕盈盛而釁隙生讒賊興而根本感變強爲弱易於
反掌吁可畏哉天祚自絕大石苟延國旣丘墟史亦
蕪蕪耶律儼語多避忌陳大任辭乏精詳五代史繫
之終篇宋舊史埒諸載記予奪各徇其主傳聞况失
其真我

祖皇帝一視同仁深加愍惻嘗

修史官員

都總裁

開府儀同三司上柱國錄軍國重事中書右丞相

監修國史領 經筵事臣脫脫

總裁官

光祿大夫中書平章政事知 經筵事提調都

水監臣鐵睦爾達世

榮祿大夫中書平章政事知 經筵事臣賀惟一

翰林學士承 旨榮祿大夫知 制誥兼修

國史臣張起巖

翰林學士資善大夫知制誥同修國史臣歐陽玄
集賢侍講學士通奉大夫兼國子祭酒臣呂思誠
翰林侍講學士中奉大夫知制誥同修國
史同知經筵事臣揭傒斯
纂修官

正議大夫兵部尚書臣廉惠山海牙

翰林直學士朝請大夫知制誥同修國史

兼經筵官臣王沂

文林郎秘書監著作佐郎臣徐曷

將士佐郎翰林國史院編修官臣陳繹曾

否是非不迷千載之實臣脫脫叨承隆寄幸覩成功
載宣

日月之光華願效涓埃之補報我

朝之論議歸正氣之直則辭之昌遼國之君臣有知善
者喜而惡者懼所撰本紀三十卷志三十一卷表八
卷列傳四十六卷各著論贊具存體裁隨表以

聞上塵

天覽下情無任慚懼戰汗屏營之至臣脫脫誠惶誠懼
頓首頓首謹言

至正四年三月日開府儀同三司程國錄軍國事書哀相錄國史續經筵事臣脫脫表

勅詞臣撰次三史首及於遼六十餘年歲月因循造
物有待臣脫脫誠惶誠恐頓首頓首欽惟

皇帝陛下

如堯稽古而簡寬容衆

若舜好問而濬哲冠倫

講經兼誦乎

祖謨

訪治旁求乎往牒茲修史事斷自

宸衷

睿旨下而徵聘行朝士賀而遺逸起於是命臣脫脫

以中書右丞相領都總裁中書平章政事臣鐵睦爾
達世中書右丞今平章政事臣賀惟一御史中丞今
翰林學士承旨臣張起巖翰林學士臣歐陽玄侍御
史今集賢侍講學士兼國子祭酒臣呂思誠翰林侍
講學士臣揭傒斯奉

命爲總裁官中書遴選儒臣宗文太監今兵部尚書
臣廉惠山海牙翰林直學士臣王沂秘書著作佐郎
臣徐昂國史院編修官臣陳繹曾分撰遼史起至正
三年四月迄四年三月發故府之櫝藏集遐方之匱
獻蒐羅剔抉刪潤研劂紀志表傳備成一代之書臧

提調官

資德大夫中書右丞

臣

伯顏

榮祿大夫中書左丞

臣

姚庸

奉議大夫叅議中書省事

臣

長仙

通議大夫叅議中書省事

臣

呂彬

朝散大夫中書右司郎中

臣

悟良哈台

嘉議大夫中書左司郎中

臣

趙守禮

亞中大夫中書左司員外郎

臣

僕哲篤

亞中大夫中書省左司員外郎

臣

何執禮

儒林郎右司都事

臣

觀音奴

奉議大夫左司都事

臣

烏古孫良積

嘉議大夫禮部尚書

臣

王守誠

中憲大夫工部尚書

臣

丁元

奉議大夫禮部侍郎

臣

老老

嘉議大夫禮部侍郎

臣

杜秉彝

遼史目錄

凡一百一十六卷

本紀三十卷

志三十一卷

表八卷

列傳四十五卷

遼史卷一

本紀第一

太祖上

遼史卷二

本紀第二

太祖下

遼史卷三

太宗上

本紀第三

遼史卷四

太宗下

本紀第四

遼史卷五

世宗

本紀第五

遼史卷六

穆宗上

本紀第六

遼史卷七

穆宗下

本紀第七

遼史卷八

景宗上

本紀第八

遼史卷九

景宗下

本紀第九

遼史卷十

聖宗一

本紀第十

遼史卷十一

聖宗二

本紀第十一

遼史卷十二

聖宗三

本紀第十二

遼史卷十三

聖宗四

本紀第十三

遼史卷十四

聖宗五

本紀第十四

遼史卷十五

聖宗六

本紀第十五

遼史卷十六

聖宗七

本紀第十六

遼史卷十七

聖宗八

本紀第十七

遼史卷十八

興宗一

本紀第十八

遼史卷十九

興宗二

本紀第十九

遼史卷二十

興宗三

本紀第二十

遼史卷二十一

道宗一

本紀第二十一

遼史卷二十二

道宗二

本紀第二十二

通志目錄

遼史卷二十三

本紀第二十三

道宗三

遼史卷二十四

本紀第二十四

道宗四

遼史卷二十五

本紀第二十五

道宗五

遼史卷二十六

本紀第二十六

道宗六

遼史卷二十七

本紀第二十七

天祚一

遼史卷二十八

本紀第二十八

天祚二

遼史卷二十九

本紀第二十九

天祚三

遼史卷三十

本紀第三十

天祚四

遼史卷三十一

志第一

營衛上

宮衛

遼史卷三十二

志第二

萬曆三十四年刊

日

營衛中

捺鉢

部族上

遼史卷三十三

志第三

營衛下

部族下

遼史卷三十四

志第四

兵衛上

兵制

遼史卷三十五

志第五

兵衛中

御帳親軍

宮衛騎軍

大首領軍

衆部族軍

遼史卷三十六

志第六

兵衛下

五京都鄉丁

屬國軍

邊境戍兵

遼史卷三十七

志第七

地理一

上京道

邊防城

遼史卷三十八

志第八

地理二

東京道

遼史卷三十九

志第九

地理三

中京道

遼史卷四十

志第十

地理四

南京道

遼史卷四十一

志第十一

地理五

西京道

遼史卷四十二

志第十二

曆象上

大明曆元

遼史卷四十三

志第十三

曆象中

閏考

遼史卷四十四

志第十四

曆象下

朔考下

象

刻漏

官星

遼史卷四十五

志第十五

百官一

北面

遼史卷四十六

志第十六

百官二

北面

遼史卷四十七

志第十七上

百官三

南面

遼史卷四十八

志第十七下

百官四

南面

遼史卷四十九

志第十八

禮一

吉儀

遼史卷五十

志第十九

禮二

凶儀

遼史卷五十一

志第二十

禮三

軍儀

禮四

賓儀

遼史卷五十二

志第二十一

禮五

嘉儀上

遼史卷五十三

志第二十二

禮六

嘉儀下

遼史卷五十四

志第二十三

樂

國樂

雅樂

大樂

散樂

鼓吹樂

橫吹樂

遼史卷五十五

志第二十四

儀衛一

國輿

漢輿

遼史卷五十六

志第二十五

儀衛二

遼史目錄
國服

漢服

遼史卷五十七

志第二十六

儀衛三

符印

遼史卷五十八

志第二十七

儀衛四

國仗

渤海仗

漢仗

鹵簿儀仗總目

遼史卷五十九

志第二十八

食貨上

遼史卷六十

志第二十九

食貨下

遼史卷六十一

志第三十

刑法上

遼史卷六十二

志第三十一

刑法下

遼史卷六十三

表第一

世表

遼史卷六十四

表第二

皇子表

遼史卷六十五

公主表

表第三

遼史卷六十六

皇族表

表第四

遼史卷六十七

外戚表

表第五

遼史卷六十八

遊幸表

表第六

遼史卷六十九

部族表

表第七

遼史卷七十

屬國表

表第八

遼史卷七十一

后妃

列傳第一

蕭祖昭烈皇后蕭氏

懿祖莊敬皇后蕭氏

玄祖簡獻皇后蕭氏

德祖宣簡皇后蕭氏

太祖淳欽皇后述律氏

太宗靖安皇后蕭氏

世宗懷節皇后蕭氏

世宗妃甄氏

穆宗皇后蕭氏

景宗睿知皇后蕭氏

聖宗仁德皇后蕭氏

聖宗欽哀皇后蕭氏

興宗仁懿皇后蕭氏

興宗貴妃蕭氏

道宗宣懿皇后蕭氏

道宗惠妃蕭氏

遼史目錄

遼史卷七十二

列傳第二

宗室

天祚皇后蕭氏

天祚德妃蕭氏

天祚文妃蕭氏

天祚元妃蕭氏

義宗 倍

子平王隆先

晉王道隱

章肅皇帝

李胡

子宋王喜隱

順宗 濬

晉王救盧幹

遼史卷七十三

列傳第三

萬曆三十四年刊

遼史目錄

十一

耶律曷魯

蕭敵魯 阿古只

耶律斜捏赤 老古

頗德

耶律欲穩

耶律海里

遼史卷七十四

列傳第四

耶律敵刺

蕭痕篤

康默記 延壽

韓延徽 德樞 紹芳

韓知古 匡嗣 德原

德凝

遼史卷七十五

耶律靚烈 羽之

耶律鐸臻 古不

突呂

王郁

耶律圖魯窘

遼史卷七十六

列傳第七

耶律解里

耶律拔里得

耶律朔古

耶律魯不古

趙延壽

高模翰

趙思溫

耶律漚里思

張礪

遼史卷七十七

列傳第八

耶律屋質

耶律吼 何魯不

耶律安搏

耶律洼

耶律頽昱

耶律撻烈

遼史卷七十八

列傳第八

耶律夷鵬葛

蕭海璠

蕭護思

蕭思温

蕭繼先

遼史卷七十九

列傳第九

室昉

耶律賢適

女里

郭襲

耶律阿没里

遼史卷八十

列傳第十

張儉

邢抱朴

馬德臣

蕭朴

耶律八哥

遼史卷八十一

列傳第十一

耶律室魯

歐里斯

王繼忠

蕭孝忠

陳昭袞

蕭合卓

遼史卷八十二

列傳第十二

耶律隆運

德威

滌魯

制心

耶律勃古哲

蕭陽阿

武白

蕭常哥

耶律虎古

唐魯古

遼史卷八十三

列傳第十三

耶律休哥

馬哥

耶律斜軫

耶律奚低

耶律學古

烏不呂

遼史卷八十四

列傳第十四

耶律沙

耶律抹只

蕭幹

討古

耶律善補

耶律海里

遼史卷八十五

列傳第十五

蕭撻凜

蕭觀音奴

耶律題子

耶律諧理

耶律奴瓜

蕭柳

高勲

奚和朔奴

蕭塔烈葛

耶律撒合

遼史卷八十六

列傳第十六

耶律合住

劉景

劉六符

耶律裏履

牛溫舒

杜防

蕭和尚

特末

耶律合理只

耶律頗的

遼史卷八十七

列傳第十七

蕭孝穆 撒八 孝友

孝先

蕭蒲奴

耶律蒲古

夏行美

遼史卷八十八

列傳第十八

蕭敵烈 拔刺

耶律盆奴

蕭排押 恒德匹敵

耶律資忠

耶律瑤質

耶律弘古

高王

耶律的琿

大康父

遼史卷八十九

列傳第十九

耶律庶成 庶歲 蒲魯

楊哲

耶律韓留

楊佖

耶律和尚

遼史卷九十

列傳第二十

蕭阿剌

耶律義先 弟信先

蕭陶隗

蕭塔刺葛

耶律敵祿

遼史卷九十一

列傳第二十一

耶律韓八

耶律唐古

蕭朮哲 姪藥師奴

耶律瑛

耶律僕里篤

遼史卷九十二

列傳第二十二

蕭奪刺

蕭普達

耶律侯哂

耶律古昱

耶律獨擲

蕭韓家

蕭烏野

遼史卷九十三

列傳第二十三

蕭惠

蕭迂魯 鐸盧幹

蕭圖玉

耶律鐸軫

遼史卷九十四

列傳第二十四

耶律化哥

耶律幹臘

耶律速撒

蕭阿魯帶

耶律那也

耶律阿魯掃古

耶律世良

遼史卷九十五

列傳第二十五

耶律弘古

耶律馬六

蒲滴洌

耶律適祿

耶律陳家奴

耶律特麼

耶律仙童

蕭素颺

耶律大悲奴

遼史卷九十六

耶律仁先 撻不也

列傳第二十六

耶律良

蕭韓家奴

蕭德

蕭惟信

蕭樂音奴

耶律敵烈

姚景行

耶律阿思

遼史卷九十七

列傳第二十七

耶律幹特刺

孩里

竇景庸

耶律引吉

楊績

趙徽

王觀

耶律喜孫

遼史卷九十八

列傳第二十八

蕭兀納

耶律儼

劉伸

耶律胡呂

遼史卷九十九

列傳第二十九

蕭巖壽

耶律撒刺

蕭速撒

耶律撻不也

蕭撻不也

蕭忽古

耶律石柳

遼史卷一百

列傳第三十

耶律棠古

蕭得里底

蕭酬幹

耶律章奴

耶律朮者

遼史卷一百一

列傳第三十一

蕭陶蘇幹

耶律阿息保

蕭乙薛

蕭胡篤

遼史卷一百二

列傳第三十二

蕭奉先

李處温

張琳

耶律余覲

遼史卷一百三

列傳第三十三

文學上

蕭韓家奴

遼史卷一百四

列傳第三十四

文學下

王鼎

耶律昭

劉輝

耶律孟簡

耶律谷欲

遼史卷一百五

列傳第三十五

能吏

太公鼎

蕭文

遼史目錄

馬人望

耶律鐸魯幹

楊遵勗

王棠

遼史卷一百六

列傳第三十六

卓行

蕭扎刺

耶律官奴

蕭蒲离不

遼史卷一百七

列傳第三十七

烈女

邢簡妻

耶律氏常哥

耶律奴妻

耶律木者妻

耶律中妻

遼史卷一百八

列傳第三十八

方技

直魯古

主白

魏璘

耶律敵魯

耶律乙不哥

遼史卷一百九

列傳第三十九

伶官

羅衣輕

宦官

萬曆三十四年刊

七

王繼恩

趙安仁

遼史卷一百一十

列傳第四十

姦臣上

耶律乙辛

張孝傑

耶律燕哥

蕭十三

遼史卷一百一十一

列傳第四十一

姦臣下

蕭余里也

耶律合魯

蕭得裏特

蕭訛都幹

蕭達魯古

耶律塔不也

蕭圖古辭

遼史卷一百一十二

列傳第四十二

逆臣上

轄底 送里時

察割

重元 涅魯古

滑哥

遼史卷一百一十三

列傳第四十三

逆臣中

蕭翰

耶律牒臘

耶律朗

耶律劉哥 益郎化葛里奚蹇

耶律海思

耶律敵獵

蕭革

遼史卷一百一十四

列傳第四十四

逆臣下

蕭胡覩

蕭迭里得

古迭

耶律撒刺竹

奚回離保

蕭特烈

遼史卷一百一十五

列傳第四十五

外紀

高麗

西夏

遼史卷一百一十六

列傳第四十六

國語解

遼史目錄終

遼史卷一

本紀第一

元開府儀同三司上柱國前中書右丞相兼修國史都總裁脫脫修
皇明奉訓大夫右春坊右諭德兼翰林院侍講署國子監事臣沈灌等

奉

勅重校刊

太祖上

太祖大聖大明神烈天皇帝姓耶律氏諱億字阿保機
小字啜里只契丹迭刺部霞瀨益石烈鄉耶律彌里人
德祖皇帝長子母曰宣簡皇后蕭氏唐咸通十三年生
初母夢日墮懷中有娠及生室有神光異香體如三歲

兒卽能匍匐祖母簡獻皇后異之鞠爲己子常匿於別幕塗其面不令他人見三月能行晬而能言知未然事自謂左右若有神人翼衛雖齟齬言必及世務時伯父當國疑輒咨焉旣長身長九尺豐上銳下目光射人關弓三百斤爲撻馬狻沙里時小黃室韋不附太祖以計降之伐越兀及烏古六奚比沙狻諸部克之國人號阿主沙里唐天復元年歲辛酉痕德堇可汗立以太祖爲本部夷离堇專征討連破室韋于厥及奚帥轄刺哥俘獲甚衆冬十月授大迭烈府夷离堇明年秋七月以兵四十萬伐河東河北攻下九郡獲生口九萬五千馳馬

牛羊不可勝紀九月城龍化州于潢河之南始建開教寺明年春伐女直下之獲其戶三百九月復攻下河東懷遠等軍冬十月引軍畧至薊北俘獲以還先是德祖俘奚七千戶徙饒樂之清河至是創爲奚迭刺部分十三縣遂拜太祖于越總知軍國事明年歲甲子三月廣龍化州之東城九月討黑車子室韋唐盧龍軍節度使劉仁恭發兵數萬遣養子趙霸來拒霸至武州太祖謀知之伏勁兵桃山下遣室韋人牟里詐稱其酋長所遣約霸兵會平原旣至四面伏發擒霸殲其衆乘勝大破室韋明年七月復討黑車子室韋唐河東節度使李克

用遣通事康令德乞盟冬十月太祖以騎兵七萬會克
用于雲州宴酣克用借兵以報劉仁恭木瓜澗之役太
祖許之易袍馬約爲兄弟及進兵擊仁恭拔數州盡徙
其民以歸明年二月復擊劉仁恭還襲山北奚破之汴
州朱全忠遣人浮海奉書幣衣帶珎玩來聘十一月遣
偏師討奚霫諸部及東北女直之未附者悉破降之十
二月痕德堇可汗殂羣臣奉遺命請立太祖曷魯等勸
進太祖三讓從之

元年春正月庚寅命有司設壇于如迂王集會塙燔柴
告天卽皇帝位尊母蕭氏爲皇太后立皇后蕭氏北宰

相蕭轄刺南宰相耶律歐里思率羣臣上尊號曰天皇
帝后曰地皇后庚子詔皇族承遙輦氏九帳爲第十帳
二月戊午以從弟迭栗底爲迭烈府夷离堇是月征黑
車子室韋降其八部夏四月丁未朔唐梁王朱全忠廢
其主尋弒之自立爲帝國號梁遣使來告劉仁恭子守
光囚其父自稱幽州盧龍軍節度使秋七月乙酉其兄
平州刺史守奇率其衆數千人來降命置之平盧城冬
十月乙巳討黑車子室韋破之

二年春正月癸酉朔御正殿受百官及諸國使朝辛巳
始置惕隱典族屬以皇弟撒剌爲之河東李克用子存

勗襲遣使弔慰夏五月癸酉詔撒剌討烏丸黑車子室
韋秋八月壬子幽州進合歡瓜冬十月己亥朔建明王
樓築長城於鎮東海口遣輕兵取吐渾叛入室韋者
三年春正月幸遼東二月丁酉朔梁遣郎公遠來聘三
月滄州節度使劉守文爲弟守光所攻遣人來乞兵討
之命皇弟舍利素夷离董蕭敵魯以兵會守文於北淖
口進至橫海軍近淀一鼓破之守光潰去因名北淖口
爲會盟口夏四月乙卯詔左僕射韓知古建碑龍化州
大廣寺以紀功德五月甲申置羊城于炭山之北以通
市易冬十月己巳遣鷹軍討黑車子室韋破之西北盟

娘改部族進輓車人

四年秋七月戊子朔以后兄蕭敵魯爲北府宰相后族
爲相自此始冬十月烏馬山奚庫支及查刺底鋤勃德
等叛討平之

五年春正月丙戌朔日有食之丙申上親征西部奚奚
阻險叛服不常數招諭弗聽是役所向輒下遂分兵討
東部奚亦平之於是盡有奚霫之地東際海南暨白檀
西踰松漠北抵潢水凡五部咸入版籍三月次灤河刻
石紀功復畧地薊州夏四月壬申遣人使梁五月皇弟
刺葛迭刺寅底石安端謀反安端妻粘睦姑知之以告

得實上不忍加誅乃與諸弟登山刑牲告天地爲誓而赦其罪出刺葛爲迭刺部夷离董封粘睦姑爲晉國夫人秋七月壬午朔斜離底洎諸蕃使來貢八月甲子劉守光僭號幽州稱燕冬十月戊午置鐵冶十一月壬午遣人使梁

六年春正月以化葛爲惕隱二月戊午親征劉守光三月至自幽州夏四月梁郢王友珪弑父自立秋七月丙午親征木不姑降之俘獲以數萬計命弟刺葛分兵攻平州八月壬辰上次恩德山皇子李胡生冬十月戊寅刺葛破平州還復與迭刺寅底石安端等反甲申遣人

使梁致祭壬辰還次北阿魯山聞諸弟以兵阻道引軍南趨十七灤是日燔柴翼日次七渡河諸弟各遣人謝罪上猶矜憐許以自新是歲以兵討兩冶以所獲僧崇文等五十人歸西樓建天雄寺以居之以示天助雄武七年春正月甲辰朔以用兵免朝晉王李存勗拔幽州擒劉守光甲寅王師次赤水城弟刺葛等乞降上素服乘赭白馬以將軍耶律樂姑轄刺僅阿鉢爲御解兵器肅侍衛以受之因加慰諭刺葛等引退上復數遣使撫慰二月甲戌朔梁均王友貞討殺其兄友珪嗣立三月癸丑次蘆水弟迭刺哥圖爲奚王與安端擁千餘騎而

至給稱入覲上怒曰爾曹始謀逆亂朕特恕之使改過自新尚爾反覆將不利於朕遂拘之以所部分隸諸軍而刺葛引其衆至乙室董淀具天子旗鼓將自立皇太后陰遣人諭令避去會弭姑乃懷里陽言車駕且至其衆驚潰掠居民北走上以兵追之刺葛遣其黨寅底石引兵徑趨行宮焚其輜重廬帳縱兵大殺皇后急遣蜀古魯救之僅得天子旗鼓而已其黨神速姑復劫西樓焚明王樓上至土河秣馬休兵若不爲意諸將請急追之上曰俟其遠遁人各懷土懷土旣切其心必離我軍乘之破之必矣盡以先所獲資畜分賜將士留夷裔畢

直里姑總政務夏四月戊寅北追刺葛已卯次彌里問諸弟面木葉山射鬼箭厭禳乃執叛人解里向彼亦以其法厭之至達里淀選輕騎追及培只河盡獲其黨輜重生口先遣室常及吐渾會長拔刺迪里姑等五人分兵伏其前路命北宰相迪里古爲先鋒進擊之刺葛率兵逆戰迪里古以輕兵薄之其弟遏古只臨陣射數十人斃衆莫敢前相拒至晡衆乃潰追至柴河遂自焚其車乘廬帳而去前遇拔刺迪里姑等伏發合擊遂大敗之刺葛奔潰遣其所奪神帳於路上見而拜奠之所獲生口盡縱歸本土其黨庫古只磨朶皆面縛請罪師次

札堵河大雨暴漲五月癸丑遣北宰相迪輦率驍騎先
渡甲寅奏擒刺葛涅里袞阿鉢於榆河前北宰相蕭實
魯寅底石自剄不殊遂以黑白羊祭天地壬戌刺葛涅
里袞阿鉢詣行在以橐索自縛牽羊望拜上還至大嶺
時大軍久出輜重不相屬士卒煮馬駒採野菜以爲食
孳畜道斃者十七八物價十倍器服資貨委棄於楚里
河狼藉數百里因更刺葛名暴里丙寅至庫里以青牛
白馬祭天地以生口六百馬二千三百分賜大小鶻軍
六月辛巳至榆嶺以轄賴縣人掃古非法殘民磔之甲
申上登都庵山撫其先奇首可汗遺跡徘徊顧瞻而興

歎焉聞獄官涅离擅造大校人不堪其苦有至死者命
誅之壬辰次狼河獲逆黨雅里彌里生蕤之銅河南軌
下放所俘還多爲于骨里所掠上怒引輕騎馳擊復遣
驍將分道追襲盡獲其衆并掠者庚子次阿敦灤以養
子涅里思附諸弟叛以鬼箭射殺之其餘黨六千各以
輕重論刑于厥掠生口者三十餘人亦俾贖其罪放歸
本部至石嶺西詔收回軍乏食所棄兵仗召北府兵驗
而還之以夷离董涅里袞附諸弟爲叛不忍顯戮命自
投崖而死秋八月己卯幸龍眉宮輟途黨二十九人以
其妻女賜有功將校所掠珍寶孳畜還主亡其本物者

命責償其家不能償者賜以其部曲九月壬戌上發自西樓冬十月庚午駐赤崖戊寅和州回鶻來貢癸未乙室府人迪里古迷骨离部人特里以從逾誅詔羣臣分決滯訟以韓知古錄其事只里姑掌捕亡十一月祠木葉山還次昭烏山省風俗見高年議朝政定吉凶儀十二月戊子燔柴于蓮花樂

八年春正月甲辰以曷魯爲迭刺部夷离董忽烈爲惕隱于骨里部人特离敏執逾黨怖胡亞里只等十七人來獻上親鞫之辭多連宗室及有脅從者乃杖殺首惡怖胡餘竝原釋于越率懶之子化哥屢蓄姦謀上每優

容之而反覆不悛召父老羣臣正其罪并其子戮之分其財以給衛士有司所鞫逾黨三百餘人獄旣具上以人命至重死不復生賜宴一日隨其平生之好使爲之酒酣或歌或舞或戲射角觝各極其意明日乃以輕重論刑首惡刺葛其次迭刺哥上猶第之不忍寘法杖而釋之以寅底石安端性本庸弱爲刺葛所使皆釋其罪前于越赫底里子解里刺葛妻轄刺已實預逾謀命皆絞殺之寅底石妻涅离脅從安端妻粘睦姑嘗有忠告竝免因謂左右曰諸弟性雖敏黠而蓄姦稔惡嘗自矜有出人之智安忍兇狼豁壑可塞而貪黷無厭求人之

通史卷一
本紀
失雖小而可恕謂重如泰山身行不義雖入大惡謂輕於鴻毛昵比羣小謀及婦人同惡相濟以危國祚雖欲不敗其可得乎北宰相實魯妻餘盧覩姑於國至親一旦負朕從于叛逆未寘之法而病死此天誅也解里自幼與朕嘗同寢食眷遇之厚冠於宗屬亦與其父背大恩而從不軌茲可恕乎秋七月丙申朔有司上諸帳族與謀逆者三百餘人罪狀皆棄市上歎曰致人于死豈朕所欲若止負朕躬尚可容貸此曹恣行不道殘害忠良塗炭生民剽掠財產民間昔有萬馬今皆徒步有國以來所未嘗有實不得已而誅之冬十月甲子朔建開

皇殿於明王樓基

九年春正月烏古部叛討平之夏六月幽州軍校齊行本舉其族及其部曲男女三千人請降詔授檢校尚書左僕射賜名兀欲給其廩食數日亡去幽帥周德威納之及詔索之德威語不遜乃議南征冬十月戊申釣魚于鴨渌江新羅遣使貢方物高麗遣使進寶劍吳越王錢鏐遣滕彥休來貢是歲君基太一神數見詔圖其像神冊元年春二月丙戌朔上在龍化州迭烈部夷离董耶律曷魯等率百僚請上尊號三表乃允丙申羣臣及諸屬國築壇州東上尊號曰大聖大明天皇帝后曰應

通史卷一
本系
天大明地皇后大赦建元神冊初闕地爲壇得金鈴因
名其地曰金鈴岡壇側蒲林曰冊聖林三月丙辰以迭
烈部夷离董曷魯爲阿盧朶里干越百僚進秩頒賚有
差賜酺三日立子倍爲皇太子夏四月乙酉朔晉幽州
節度使盧國用來降以爲幽州兵馬留後甲辰梁遣郎
公遠來賀六月庚寅吳越王遣滕彥休來貢秋七月壬
申親征突厥吐渾党項小蕃沙陀諸部皆平之俘其酋
長及其戶萬五千六百鎧甲兵仗器服九十餘萬寶貨
駝馬牛羊不可勝筭八月拔朔州擒節度使李嗣本勒
石紀功於青塚南冬十月癸未朔乘勝而東十一月攻

蔚新武媯儒五州斬首萬四千七百餘級自代北至河
曲踰陰山盡有其地遂改武州爲歸化州媯州爲可汗
州置西南面招討司選有功者領之其圍蔚州敵樓無
故自壞衆軍大譟乘之不踰時而破時梁及吳越二使
皆在焉詔引環城觀之因賜滕彥休名曰述呂十二月
收山北八軍

二年春二月晉新州裨將盧文進殺節度使李存矩來
降進攻其城刺史安金全遁以文進部將劉殷爲刺史
三月辛亥攻幽州節度使周德威以幽并鎮定魏五州
兵拒于居庸關之西合戰於新州東大破之斬首三萬

通史卷一
乙巳
十一
餘級殺李嗣本之子武八以后弟阿骨只爲統軍實魯
爲先鋒東出關畧燕趙不遇敵而還己未于骨里叛命
室魯以兵討之夏四月壬午圍幽州不克六月乙巳望
城中有氣如煙火狀上曰未可攻也以大暑霖潦班師
留曷魯盧國用守之刺葛與其子賽保里叛入幽州秋
八月李存勗遣李嗣源等救幽州曷魯等以兵少而還
三年春正月丙申以皇弟安端爲大內惕隱命攻雲州
及西南諸部二月達旦國來聘癸亥城皇都以禮部尚
書康默記充版築使梁遣使來聘晉吳越渤海高麗回
鶻阻卜党項及幽鎮定魏潞等州各遣使來貢夏四月

乙巳皇弟迭烈哥謀叛事覺知有罪當誅預爲營壙而
諸戚請免上素惡其弟寅底石妻涅里袞乃曰涅里袞
能代其死則從涅里袞自縊壙中并以奴女古叛人曷
魯只生瘞其中遂赦迭烈哥五月乙亥詔建孔子廟佛
寺道觀秋七月乙酉于越曷魯薨上震悼久之輟朝三
日贈賻有加冬十二月庚子朔幸遼陽故城辛丑北府
宰相蕭敵魯薨戊午以于越曷魯弟汗里軫爲迭烈部
夷离董蕭阿古只爲北府宰相甲子皇孫隈欲生

遼史卷一終

遼史卷二

本紀第二

元開府儀同三司上柱國前中書右丞相兼修國史都總裁脫脫修
皇明奉訓大夫右春坊右諭德兼翰林院侍講署國子監事臣沈淮等
奉

勅重校刊

太祖下

四年春正月丙申射虎東山二月丙寅修遼陽故城以
漢民渤海戶實之改爲東平郡置防禦使夏五月庚辰
至自東平郡秋八月丁酉謁孔子廟命皇后皇太子分
謁寺觀九月征烏古部道聞皇太后不豫一日馳六百

里還侍太后病間復還軍中冬十月丙午次烏古部天
大風雪兵不能進上禱于天俄頃而霽命皇太子將先
鋒軍進擊破之俘獲生口萬四千二百牛馬車乘廬帳
器物二十餘萬自是舉部來附

五年春正月乙丑始製契丹大字夏五月丙寅吳越王
復遣滕彥休貢犀角珊瑚授官以遣庚辰有龍見于拽
刺山陽水上上射獲之藏其骨內府閏六月丁卯以皇
弟蘇爲惕隱康默記爲夷離畢秋八月己未朔党項諸
部叛辛未上親征九月己丑朔梁遣郎公遠來聘壬寅
大字成詔頒行之皇太子率迭刺部夷離董汗里軫等

畧地雲內天德冬十月辛未攻天德癸酉節度使宋瑤
降賜弓矢鞍馬旗鼓更其軍曰應天甲戌班師宋瑤復
叛丙子拔其城擒宋瑤俘其家屬徙其民於陰山南十
二月己未師還

六年春正月丙午以皇弟蘇爲南府宰相迭里爲惕隱
南府宰相自諸弟構亂府之名族多罹其禍故其位久
虛以鋤得部轄得里只里古攝之府中數請擇任宗室
上以舊制不可輒變請不已乃告于宗廟而後授之宗
室爲南府宰相自此始夏五月丙戌朔詔定法律正班
爵丙申詔畫前代直臣像爲招諫圖及詔長吏四孟月

詢民利病六月乙卯朔日有食之冬十月癸丑朔晉新
州防禦使王郁以所部山北兵馬內附丙子上率大軍
入居庸關十一月癸卯下古北口丁未分兵畧檀順安
遠三河良鄉望都潞滿城遂城等十餘城俘其民徙內
地十二月癸丑王郁率其衆來朝上呼郁爲子賞賚甚
厚而徙其衆于潢水之南庚申皇太子率王郁畧地定
州康默記攻長蘆晉義武軍節度使王處直養子都囚
其父自稱留後癸亥圍涿州有白兔緣壘而上是日破
其郭癸酉刺史李嗣弼以城降乙亥存勗至定州王都
迎謁馬前存勗引兵趨望都遇我軍禿飯五千騎圍之

存勗力戰數四不解李嗣昭領三百騎來救我軍少却
存勗乃得出大戰我軍不利引歸存勗至幽州遣二百
騎躡我軍後我軍反擊悉擒之己卯還次檀州幽人來
襲擊走之擒其裨將詔徙檀順民于東平瀋州

天贊元年春二月庚申復徇幽薊地癸酉詔改元赦軍
前殊死以下夏四月甲寅攻薊州戊午拔之擒刺史胡
瓊以盧國用涅魯古典軍民事壬戌大饗軍士癸亥李
存勗圍鎮州張文禮求援命郎君迭烈將軍康末怛往
擊敗之殺其將李嗣昭辛未攻石城縣拔之五月丁未
張文禮卒其子處瑾遣人奉表來謝六月遣鷹軍擊西

通史卷二
三
南諸部以所獲賜貧民冬十月甲子以蕭霞的爲北府宰相分迭刺部爲二院斜涅赤爲北院夷离董縮思爲南院夷离董詔分北大濃兀爲二部立兩節度使以統之十一月壬寅命皇子堯骨爲天下兵馬大元帥畧地薊北

二年春正月丙申大元帥堯骨克平州獲刺史趙思温裨將張崇二月如平州甲子以平州爲盧龍軍置節度使三月戊寅軍于箭筈山討叛奚胡損獲之射以鬼箭誅其黨三百人沉之狗河置奚墮瑰部以勃魯恩權總其事夏四月己酉梁遣使來聘吳越王遣使來貢癸丑

命堯骨攻幽州迭刺部夷离董覲烈殉山西地庚申堯骨軍幽州東節度使符存審遣人出戰敗之擒其將裴信父子閏月庚辰堯骨抵鎮州壬午拔曲陽丙戌下北平是月晉王李存勗卽皇帝位國號唐五月戊午堯骨師還癸亥大饗軍士賞賚有差六月辛丑波斯國來貢秋七月前北府宰相蕭阿古只及王郁徇地燕趙冬十月辛未朔日有食之己卯唐兵滅梁

三年春正月遣兵畧地燕南夏五月丙午以楊隱迭里爲南院夷离董是月徙薊州民實遼州地渤海殺其刺史張秀實而掠其民六月乙酉召皇后皇太子大元帥

及二宰相諸部頭等詔曰上天降監惠及烝民聖主明
王萬載一遇朕旣上承天命下統羣生每有征行皆奉
天意是以機謀在已取舍如神國令旣行人情大附舛
訛歸正遐邇無愆可謂大含溟海安納泰山矣自我國
之經營爲羣方之父母憲章斯在胤嗣何憂升降有期
去來在我良籌聖會自有契於天人衆國羣王豈可化
其凡骨三年之後歲在丙戌時值初秋必有歸處然未
終兩事豈負親誠日月非遙戒嚴是速聞詔者皆驚懼
莫識其意是日大舉征吐渾党項阻卜等部詔皇太子
監國大元帥堯骨從行秋七月辛亥曷刺等擊素昆那

山東部族破之八月乙酉至烏孤山以鵝祭天甲午次
古單于國登阿里典壓得斯山以麋鹿祭九月丙申朔
次古回鶻城勒石紀功庚子拜日于蹕林丙午遣騎攻
阻卜南府宰相蘇南院夷离董迭里畧地西南乙卯蘇
等獻俘丁巳鑿金河水取烏山石輦致潢河木葉山以
示山川朝海宗嶽之意癸亥大食國來貢甲子詔礮闢
遏可汗故碑以契丹突厥漢字紀其功是月破胡毋思
山諸蕃部次業得思山以赤牛青馬祭天地回鶻霸里
遣使來貢冬十月丙寅朔獵寓樂山獲野獸數千以充
軍食丁卯軍于霸離思山遣兵踰流沙拔浮圖城盡取

通鑑卷三
西鄙諸部十一月乙未朔獲甘州回鶻都督畢離邊因
遣使諭其主烏母主可汗射虎于烏刺邪里山抵霸室
山六百餘里且行且獵日有鮮食軍士皆給

四年春正月壬寅以捷報皇后皇太子二月丙寅大元
帥堯骨畧党項丁卯皇后遣康末怛問起居進御服酒
膳乙亥蕭阿古只畧燕趙還進牙旗兵仗辛卯堯骨獻
党項俘三月丙申饗軍于水精山夏四月甲子南攻小
蕃下之皇后皇太子迎謁於札里河癸酉回鶻烏母主
可汗遣使貢謝五月甲寅清暑室韋北陁秋九月癸巳
至自西征冬十月丁卯唐以滅梁來告卽遣使報聘庚

辰日本國來貢辛巳高麗國來貢十一月丁酉幸安國
寺飯僧赦京師囚縱五坊鷹鷂巳酉新羅國來貢十二
月乙亥詔曰所謂兩事一事已畢惟渤海世讐未雪豈
宜安駐乃舉兵親征渤海大誣譟皇后皇太子太元帥
堯骨皆從閏月壬辰祠木葉山壬寅以青牛白馬祭天
地于烏山巳酉次撒葛山射鬼箭丁巳次商嶺夜圍扶
餘府

天顯元年春正月巳未白氣貫日庚申拔扶餘城誅其
守將丙寅命惕隱安端前北府宰相蕭阿古只等將萬
騎爲先鋒遇譚譟老相兵破之皇太子大元帥堯骨南

府宰相蘇比院夷离董斜涅赤南院夷离董迭里是夜
圍忽汗城巳巳誣譟請降庚午駐軍于忽汗城南辛未
誣譟素服橐索牽羊率僚屬三百餘人出降上優禮而
釋之甲戌詔諭渤海郡縣丙子遣近侍康末怛等十三
人入城索兵器爲邏卒所害丁丑誣譟復叛攻其城破
之駕幸城中誣譟請罪馬前詔以兵衛誣譟及族屬以
出祭告天地復還軍中二月庚寅安邊鄭頡南海定理
等府洎諸道節度刺史來朝慰勞遣之以所獲器幣諸
物賜將士壬辰以青牛白馬祭天地大赦改元天顯以
平渤海遣使報唐甲午復幸忽汗城閱府庫物賜從臣

有差以奚部長勃魯恩王郁自回鶻新羅吐蕃党項室
韋沙陀烏古等從征有功優加賞賚丙午改渤海國爲
東丹忽汗城爲天福冊皇太子倍爲人皇王以主之以
皇弟迭刺爲左大相渤海老相爲右大相渤海司徒大
素賢爲左次相耶律羽之爲右次相赦其國內殊死以
下丁未高麗濊貊鐵驪靺鞨來貢三月戊午遣夷离畢
康默記左僕射韓延徽攻長嶺府甲子祭天丁卯幸人
皇王宮巳巳安邊鄭頡定理三府叛遣安端討之丁丑
三府平壬午安端獻俘誅安邊府叛帥二人癸未宴東
舟國僚佐頒賜有差甲申幸天福城乙酉班師以太誣

選史卷三十一
七
譔舉族行夏四月丁亥朔次繖子山辛卯人皇王率東
丹國僚屬辭是月唐養子李嗣源反郭存謙弒其主存
勗嗣源遂卽位五月辛酉南海定理二府復叛大元帥
堯骨討之六月丁酉二府平丙午次慎州唐遣姚坤以
國哀來告秋七月丙辰鐵州刺史衛鈞反乙丑堯骨攻
拔鐵州庚午東丹國左大相迭剌卒辛未衛送大譔譔
于皇都西築城以居之賜譔譔名曰烏魯古妻曰阿里
只盧龍行軍司馬張崇叛奔唐甲戌次扶餘府上不豫
是夕大星隕于幄前辛巳平旦子城上見黃龍繚繞可
長一里光耀奪目入于行宮有紫黑氣蔽天踰日乃散

是日上崩年五十五天贊三年上所謂丙戌秋初必有
歸處至是乃驗壬午皇后稱制權決軍國事八月辛卯
康默記等攻下長嶺府甲午皇后奉梓宮西還壬寅堯
骨討平諸州奔赴行在乙巳人皇王倍繼至九月壬戌
南府宰相蘇薨丁卯梓宮至皇都權殯于子城西北巳
巳上謚昇天皇帝廟號太祖冬十月盧龍軍節度使盧
國用叛奔于唐十一月丙寅殺南院夷离董耶律迭里
郎君耶律匹魯等二年八月丁酉葬太祖皇帝于祖陵
置祖州天城軍節度使以奉陵寢統和二十六年七月
進謚大聖大明天皇帝重熙二十一年九月加謚大聖

大明神烈天皇帝太祖所崩行宮在扶餘城西南兩河之間後建昇天殿于此而以扶餘爲黃龍府云

贊曰遼之先出自炎帝世爲審吉國其可知者蓋自奇首云奇首生都菴山徙潢河之濱傳至雅里始立制度置官屬刻木爲契穴地爲牢讓阻午而不肯自立雅里生毗牒毗牒生頽頽頽領生耨里思大度寡欲令不嚴而人化是爲肅祖肅祖生薩刺德嘗與黃室常挑戰矢貫數札是爲懿祖懿祖生勻德實始教民稼穡善畜牧國以殷富是爲玄祖玄祖生撒刺的仁民愛物始置鐵冶教民鼓鑄是爲德祖卽太祖之父也世爲契丹遙輦

氏之夷離董執其政柄德祖之弟述瀾北征于厥室韋南畧易定奚霄始興板築置城邑教民種桑麻習織組已有廣土衆民之志而太祖受可汗之禪遂建國東征西討如折枯拉朽東自海西至于流沙北絕大漠信威萬里歷年二百豈一日之故哉周公誅管蔡人未有能非之者刺葛安端之亂太祖旣貸其死而復用之非人君之度乎舊史扶餘之變亦異矣夫

遼史卷二終

遼史卷三

本紀第三

元開府儀同三司上柱國前中書右丞相兼修國史都總裁脫脫修
 皇明奉訓大夫右春坊右諭德兼翰林院侍講署國子監事臣沈淮等
 奉

勅重校刊

太宗上

太宗孝武惠文皇帝諱德光字德謹小字堯骨太祖第
 二子母淳欽皇后蕭氏唐天復二年生神光異常獵者
 獲白鹿白鷹人以爲瑞及長貌嚴重而性寬仁軍國之
 務多所取決天贊元年授天下兵馬大元帥尋詔統六

軍南徇地明年下平州獲趙思溫張崇回破箭筈山胡
遜奚諸部悉降復以兵掠鎮定所至皆堅壁不敢戰師
次幽州符存審拒于州南縱兵邀擊大破之擒裨將裴
信等數十人及從太祖破于厥里諸部定河壩党項下
山西諸鎮取回鶻單于城東平渤海破達盧古部東西
萬里所向皆有功天顯元年七月太祖崩皇后攝軍國
事明年秋治祖陵畢冬十一月壬戌人皇王倍率羣臣
請于后曰皇子大元帥勲望中外攸屬宜承大統后從
之是日卽皇帝位癸亥謁太祖廟丙寅行柴冊禮戊辰
還都壬申御宣政殿羣臣上尊號曰嗣聖皇帝大赦有

司請改元不許十二月庚辰尊皇太后爲太皇太后皇
后爲應天皇帝太后立妃蕭氏爲皇后禮畢閱近侍班局
辛巳諸道將帥辭歸鎮巳丑祀天地庚寅遣使諭諸國
辛卯閱羣牧于近郊戊戌女直遣使來貢壬寅謁太祖
廟甲辰閱旗鼓客省諸局官屬丁未詔選遙輦氏九帳
子弟可任官者

三年春正月巳酉閱北剋兵籍庚戌閱南剋兵籍丁巳
閱皮室拽刺墨離三軍巳未黃龍府羅涅河女直達盧
古來貢庚午以王郁爲興國軍節度使守中書令二月
幸長樂巳亥惕隱涅里袞進白狼辛丑達盧古來貢三

遼史卷三
二
月乙卯東蒐癸亥獵殺斃山乙丑獵松山唐義武軍節
度使王都遣人以定州來歸唐主出師討之使來乞援
命奚秃里鐵刺往救之四月戊寅東巡巳卯祭麋鹿神
丁亥於獵所縱公私取羽毛革木之材甲午取箭材赤
山丙申獵三山鐵刺敗唐將王晏球于定州唐兵大集
鐵刺請益師辛丑命惕隱涅里袞都統查刺赴之五月
丙午建天膳堂獵索刺山戊申至自獵丁卯命林牙突
呂不討烏古部巳巳女直來貢六月巳卯行瑟瑟禮秋
七月丁未突呂不獻討烏古捷壬子王都奏唐兵破定
州鐵刺死之涅里袞查刺等數十人被執上以出師非

時甚悔之厚賜戰歿將校之家庚午有事于太祖廟八
月丙子突厥來貢庚辰詔建應天皇太后誕聖碑于儀
坤州九月巳卯突呂不遣人獻討烏古俘癸未詔分賜
羣臣巳丑幸人皇王倍第庚寅遣人使唐辛卯再幸人
皇王第癸巳有司請以上生日爲天授節皇太后生日
爲永寧節冬十月癸卯朔以永寧節上率羣臣上壽於
延和宮巳酉謁太祖廟唐遣使遺玉笛甲子天授節上
御五鸞殿受羣臣及諸國使賀十一月丙子鼻骨德來
貢辛丑自將伐唐十二月癸卯祭天地庚戌聞唐主復
遣使來聘上問左右皆曰唐數遣使來實畏威也未可

輕舉觀釁而動可也上然之甲寅次杏塢唐使至遂班師時人皇王在皇都詔遣耶律羽之遷東丹民以實東平其民或亡入新羅女直因詔困乏不能遷者許上國富民給贍而隸屬之升東平郡爲南京

四年春正月壬申朔宴羣臣及諸國使觀俳優角觝戲已卯如瓜塢二月庚戌閱遙輦氏戶籍三月甲午望祀羣神夏四月辛亥至自瓜塢壬子謁太祖廟癸丑謁太祖行宮甲寅幸天城軍謁祖陵辛酉人皇王倍來朝癸亥錄囚五月癸酉謁二儀殿宴羣臣女直來貢戊子射柳于太祖行宮癸巳行瑟瑟禮六月丙午突呂不獻烏

古俘戊申分賜將士巳酉西巡巳未選輕騎數千獵近山癸亥駐蹕涼陁秋七月庚辰觀市曲赦繫囚甲午祠太祖而東八月辛丑至自涼陁謁太祖廟癸卯幸人皇王第巳酉謁太祖廟九月庚午如南京戊寅祠木葉山巳卯行再生禮癸巳至南京冬十月壬寅幸人皇王第宴羣臣甲辰幸諸營閱軍籍庚戌以雲中郡縣未下大閱六軍甲子詔皇弟李胡帥師趣雲中討郡縣之未附者十一月丙寅朔以出師告天地丁卯餞皇弟李胡于西郊壬申命大內惕隱告出師于太祖行宮甲申觀漁三义口十二月戊申女直來貢戊午至自南京

五年春正月庚午皇弟李胡拔寰州捷至甲午朝皇太后二月巳亥詔修南京癸卯李胡還自雲中朝于行在丙午以先所俘渤海戶賜李胡丙辰上與太皇王朝皇太后太后以皆工書命書于前以觀之辛酉召羣臣議軍國事三月丙寅朝皇太后丁卯皇弟李胡請赦宗室舍利郎君以罪繫獄者詔從之巳巳幸皇叔安端第辛未人皇王獻白紵乙亥冊皇弟李胡爲壽昌皇太子兼天下兵馬大元帥壬午以龍化州節度使劉居言同中書門下平章事乙酉宴人皇王僚屬便殿庚寅駕發南京夏四月乙未詔人皇王先赴祖陵謁太祖廟丙辰會

祖陵人皇王歸國五月戊辰詔修襄潭離宮乙酉謁太祖廟巳亥射柳于行在乙卯如汾柳湖丁巳拜太祖御容于明殿巳未敵烈德來貢秋七月壬申烏古來貢戊子薦時果于太祖廟八月丁酉以大聖皇帝皇后宴寢之所號日月宮因建日月碑丙午如九層臺九月巳卯詔舍利普寧撫慰人皇王庚辰詔置人皇王儀衛丁亥至自九層臺謁及祖廟冬十月戊戌遣使賜人皇王胙癸卯建太祖聖功碑于如廷正集會塙甲辰人皇王進玉笛十一月戊寅東丹奏人皇王浮海適唐

六年春正月甲子西南邊將以慕化轄戛斯國人來乙

丑敵烈德來貢丁卯如南京三月辛未召大臣議軍國
事丁亥人皇王倍妃蕭氏率其國僚屬來見夏四月巳
酉唐遣使來聘是月置中臺省于南京五月乙丑祠木
葉山乙亥至自南京壬午謁太祖陵閏月庚寅射柳于
近郊六月壬申如涼陞壬午烏古來貢秋七月丁亥女
直來貢巳酉命將校以兵南畧壬子薦時果于太祖廟
東幸八月庚申皇子述律生告太祖廟辛巳鼻骨德來
貢九月甲午詔修京城冬十月丁丑鐵驪來貢十一月
乙酉唐遣使來聘十二月甲寅朔祭太祖廟丙辰遣人
以詔賜唐盧龍軍節度使趙德鈞

七年春正月壬辰征西將軍課里遣拽刺鐸括奏軍事
巳亥唐遣使來聘癸卯遣人使唐戊申祠木葉山二月
壬申拽刺迪里使吳越還吳越王遣使從獻寶器復遣
使持幣往報之三月巳丑林牙迪離畢指斥乘輿囚之
丁未遣使諸國戊申上率羣臣朝于皇太后夏四月甲
戌唐遣使來聘致人皇王倍書巳卯女直來貢五月壬
午朔幸祖州謁太祖陵六月戊辰御製太祖建國碑戊
寅烏古敵烈德來貢庚辰觀角觝戲秋七月辛巳朔賜
中外官吏物有差癸未賜高年布帛丙戌召羣臣耆老
議政壬辰唐遣使遺紅牙笙癸巳使復至懼報定州之

通鑑卷三
卷三
六
一
役也壬寅唐盧龍軍節度使趙德鈞遣人進時果丁未
薦新于太祖廟八月壬戌捕鵝于泚柳湖風雨暴至舟
覆溺死者六十餘人命存恤其家識以爲戒戊辰林牙
迪離畢逸囚復獲而鞫之知其事本誣構釋之九月庚
子阻卜來貢冬十月乙卯唐遣使來聘己巳遣使雲中
十一月丁亥遣使存問獲里國丁未阻卜貢海東青鶻
三十連十二月辛亥以叛人泥離袞家口分賜羣臣丁
巳西狩駐蹕平地松林

八年春正月戊子女直來貢庚子命皇太弟李胡左威
衛上將軍撒剌率兵伐党項癸卯上親餞之二月辛亥

吐谷渾阻卜來貢乙卯剋實魯使唐還以附獻物分賜
羣臣三月辛卯皇太弟討党項勝還宴勞之丙申唐遣
使請罷征党項兵上以戰捷及党項已聽命報之夏四
月戊午党項來貢五月己丑獵獨牛山惕隱迪輦所乘
內廐騮馬斃因賜名其山曰騮山戊戌如泚柳湖六月
甲寅阻卜來貢甲子回鶻阿薩蘭來貢秋七月戊寅行
納后禮癸未皇子提離古生丁亥鐵驪女直阻卜來貢
冬十月乙巳阻卜來貢丙午至自泚柳湖辛亥唐遣使
來聘己未遣拔刺使唐辛未烏古吐魯沒來貢十一月
辛丑太皇太后崩遣使告哀于唐及人皇王倍是月唐

主嗣源殂子從厚立十二月丁卯党項來貢

九年春正月癸酉漁于土河丙申党項貢馳鹿巳亥南
京進白麀閏月戊午唐遣使告哀即日遣弟弔祭壬戌
東幸女直來貢二月壬申祠木葉山戊寅葬太皇太后
于德陵前二日發喪于敢塗殿上具衰服以送後追諡
宣簡皇后詔建碑于陵三月癸卯女直來貢夏四月唐
李從珂弒其主自立人皇王倍自唐上書請討五月甲
辰如汾柳湖癸丑女直來貢大星晝隕六月巳巳朔鼻
骨德來貢辛未唐李從厚謝弔祭所遣使初至闕秋八
月壬午自將南伐乙酉拽刺解里手接飛鴈上異之因

以祭天地九月庚子西南星隕如雨乙卯次雲州丁巳
拔河陰冬十月丁亥畧地靈丘父老進牛酒犒師十一
月辛丑圍武州之陽城壬寅陽城降癸卯洼只城降括
所俘丁壯籍于軍十二月壬辰皇子阿鉢撒葛里生皇
后不豫是月駐蹕百湖之西南

十年春正月戊申皇后崩于行在二月戊寅百僚請加
追謚不許辛巳宰相涅里袞謀南奔事覺執之三月戊
午党項來貢夏四月吐谷渾酋長退欲德率衆內附丙
戌皇太后父族及母前夫之族二帳竝爲國舅以蕭緬
思爲尚父領之巳丑錄囚五月甲午朔始製服行后喪

通史卷三
八
丙午葬于奉陵上自製文謚曰彰德皇后癸丑以舍利
王庭鶚爲龍化州節度使六月乙丑吐渾來貢辛未幸
品不里淀秋七月乙卯獵南赤山冬十一月丙午幸弘
福寺爲皇后飯僧見觀音畫像乃大聖皇帝應天皇后
及人皇王所施顧左右曰昔與父母兄弟聚觀于此歲
時未幾今我獨來悲歎不已乃自製文題于壁以極追
感之意讀者悲之十二月庚辰如金瓶濼遣拽刺化哥
窟魯里阿魯掃姑等捉生敵境

十一年春正月釣魚于土河庚申如潢河三月庚寅朔
女直來貢夏四月庚申謁祖陵戊辰還都謁太祖廟辛

未燕民之復業者陳汴州事宜癸酉女直諸部來貢癸
未賜回鶻使衣有差五月戊戌清暑泂柳湖六月戊午
朔鼻骨德來貢乙酉吐谷渾來貢秋七月辛卯烏古來
貢壬辰蒲割頓公主率三河烏古來朝丙申唐河東節
度使石敬瑭爲其王所討遣趙瑩因西南路招討盧不
姑求救上白太后曰李從珂弑君自立神人共怒宜行
天討時趙德鈞亦遣使至河東復遣桑維翰來告急遂
許興師八月己未遣蕭轄里報河東師期丙寅吐谷渾
來貢庚午自將以援敬瑭九月癸巳有飛鷲自墜而死
南府夷离董曷魯恩得之以獻卜之吉上曰此從珂自

滅之兆也丁酉入鴈門戊戌次忻州祀天地巳亥次太原庚子遣使諭敬瑭曰朕興師遠來當卽與卿破賊會唐將高行周符彥卿以兵來拒遂勒兵陳于太原及戰佯爲之却唐將張敬達楊光遠又陳于西未成列以兵薄之而行周彥卿爲伏兵所斷首尾不相救敬達光遠大敗棄仗如山斬首數萬級敬達走保晉安寨夷離董的魯與戰死之敬瑭率官屬來見上執手撫慰之癸卯圍晉安甲辰以的魯子徒離骨嗣爲夷離董仍以父字爲名以旌其忠南宰相鶻離底奚監軍寅你巳將軍陪阿臨陳退懦上召切責之冬十月甲子封敬瑭爲晉王

幸其府敬瑭與妻李率其親屬捧觴上壽初圍晉安分遣精兵守其要害以絕援兵之路而李從珂遣趙延壽以兵二萬屯團栢谷范延廣以兵二萬屯遼州幽州趙德鈞以所部兵萬餘由上黨趨延壽軍合勢進擊知此有備皆逗遛不進從珂遂將精騎三萬出次河橋親督諸軍然知其不救但日酣飲悲歌而已丁卯召敬瑭至行在所賜坐上從容語之曰吾三千里舉兵而來一戰而勝殆天意也觀汝雄偉弘大宜受茲南土世爲我藩輔遂命有司設壇晉陽備禮冊命十一月丁酉冊敬瑭爲大晉皇帝自戊戌至戊申候騎兩奏南有兵至復於

西有兵至命楊隱迪輦洼拒之敬達在圍八十餘日內
外隔絕軍儲殆盡至濯馬糞屑木以飼馬馬飢至自相
啖其驥尾死則以充食光遠等勸敬達出降敬達曰吾
有死而已爾欲降寧斬吾首以降閏月甲子楊光遠安
審琦殺敬達以降上聞敬達至死不變謂左右曰凡爲
人臣當如此也命以禮葬所降軍士及馬五千匹以賜
晉帝丙寅祀天地以告成功庚午僕射蕭酷古只奏趙
德鈞等諸援兵將遁詔夜發兵追擊德鈞等軍皆投戈
棄甲自相蹂踐擠于川谷者不可勝紀仍命皇太子馳
輕騎據險要追及步兵萬餘悉降之辛未兵度團栢谷

以酒肴祀天地俄追及德鈞父子乃率衆降次潞州召
諸將議皆請班師從之命南宰相解頡離底奚監軍
寅你已將軍陪阿先還壬申楊隱洼林牙迪離畢來獻
俘晉帝辭歸上與宴飲酒酣執手約爲父子以白貂裘
一廐馬二十戰馬千二百餞之命迪離畢將五千騎送
入洛臨別謂之曰朕留此候亂定乃還耳辛巳晉帝至
河陽李從珂窮蹙召人皇王倍同死不從遣人殺之乃
舉族自焚詔收其士卒戰歿者瘞之汾水上以爲京觀
晉命桑維翰爲文紀上功德十二月乙酉朔遣近侍撻
魯存問晉帝丙戌以晉安所獲分賜將校戊子遣使馳

通志卷三
奏皇太后及報諸道師還庚寅發太原辛卯聞晉帝入
洛遣郎君解里德撫問壬辰次細河閱降將趙德鈞父
子兵馬戊戌次鴈門以沙太保所部兵分隸諸將庚戌
幸應州癸丑唐大同彰國振武三節度使迎見留之不
遣

十二年春正月丙辰次堆子口唐大同軍節度判官吳
巒閉城拒命遣崔廷勳圍其城庚申上親征至城下諭
之巒降辛酉射鬼箭于雲州北壬戌祀天地癸亥遣國
舅安端發奚西部民各還本土丙寅皇太后遣侍衛實
魯趣行是夕率輕騎先進丁丑皇子述律迎謁于灤河

告功太祖行宮戊寅朝于皇太后進玳玩爲壽二月丁
亥以軍前所獲俘叛入幽州者皆斬之壬寅詔諸部休
養士卒癸卯晉遣唐所掠郎君刺哥文班吏蕭解里還
朝三月庚申晉遣使來貢丁卯晉天雄軍節度使范延
廣潛遣人請內附不納己巳遣郎君的烈古梅里迭烈
使晉壬午晉使及諸國使來見夏四月甲申地震幸平
地松林觀潢水源五月甲寅幸頻蹕淀壬申震開皇殿
六月甲申晉遣戶部尚書聶延祚等請上尊號及歸鴈
門以北與幽薊之地仍歲貢帛三十萬疋詔不許庚戌
侍中列率言范延廣叛晉引兵南向秋七月辛亥朔詔

遼史卷三
諸部治兵甲癸丑幸懷州謁奉陵甲子晉遣使來告范
延廣反庚午遣耶律裏古皇使晉議軍事八月癸未晉
遣使復請上尊號不許庚寅晉及太原劉知遠南唐李
昇各遣使來貢庚子晉遣使以都汴及范延廣降來告
九月壬子鼻骨德來貢庚申遣直里古使晉及南唐癸
亥朮不姑女直來貢辛未遣使高麗鐵驪癸酉回鶻來
貢冬十月庚辰朔皇太后永寧節晉及回鶻燉煌諸國
皆遣使來賀壬午詔回鶻使胡离只阿刺保問其風俗
丁亥諸國使還就遣蒲里骨皮室胡末里使其國十一
月己未遣使求醫于晉丁卯鐵驪來貢十二月甲申東

幸祠木葉山癸丑醫來

遼史卷三終

萬曆三十四年刊

遼史卷三

六

三

遼史卷四
本紀第四
三

遼史卷四

本紀第四

元開府儀同三司上柱國前中書右丞相兼修國史都總裁脫脫修
皇明奉訓大夫右春坊右諭德兼翰林院侍講署國子監事臣沈淮等
奉

勅重校刊

太宗下

會同元年春正月戊申朔晉及諸國遣使來賀晉使且
言已命和凝撰聖德神功碑戊辰遣人使晉二月壬午
室韋進白鹿戊子鐵驪來貢丁酉獵松山戊戌幸遼河
東丙申上思人皇王遣惕隱率宗室以下祭其行宮丁

未詔增晉使所經供億戶三月壬戌將東幸三剋言農
務方興請減輜重促還期從之丙寅女直來貢癸酉東
幸夏四月戊寅朔如南京甲申女直來貢乙酉幸溫泉
己丑還宮朝于皇太后丁酉女直貢弓矢己亥西南邊
大詳穩耶律魯不古奏党項捷五月甲寅晉復遣使請
上尊號從之六月丙子朔吐谷渾及女直來貢辛卯南
唐來貢癸巳詔建日月四時堂圖寫古帝王事于兩廡
秋七月癸亥遣使賜晉馬丁卯遣鶻離底使晉梅里了
古使南唐戊辰遣中臺省右相耶律述蘭迭烈哥使晉
臨海軍節度使趙思溫副之冊晉帝爲英武明義皇帝

八月戊子女直來貢庚子吐谷渾烏孫靺鞨皆來貢九
月庚戌黑車子室韋貢名馬邊臣奏晉遣守司空馮道
左散騎常侍韋勳來上皇太后尊號左僕射劉煦右諫
議大夫盧重上皇帝尊號遂遣監軍寅你己克接伴壬
子詔羣臣及高年凡授大臣爵秩皆賜錦袍金帶白馬
金飾鞍勒著于令冬十月甲戌朔遣郎君迪里姑等撫
問晉使壬寅晉遣使來謝冊禮是日復有使進獨峯駝
及名馬十一月甲辰朔命南北宰相及夷離董就館賜
晉使馮道以下宴丙午上御開皇殿召見晉使壬子皇
太后御開皇殿馮道韋勳冊上尊號曰廣德至仁昭烈

崇簡應天皇帝太后甲子行再生柴冊禮丙寅皇帝御宣
政殿劉煦盧重冊上尊號曰睿文神武法天啓運明德
章信至道廣敬昭孝嗣聖皇帝大赦改元會同是月晉
復遣趙瑩奉表來賀以幽薊瀛莫涿檀順媯儒新武雲
應朔寰蔚十六州并圖籍來獻於是詔以皇都爲上京
府曰臨潢升幽州爲南京南京爲東京改新州爲奉聖
州武州爲歸化州升北南二院及乙室夷離董爲王以
主簿爲令令爲刺史刺史爲節度使二部梯里已爲司
徒達刺于爲副使麻都不爲縣令縣達刺于爲馬步置
宣徽閣門使控鶴客省御史大夫中丞侍御判官文班

牙署諸宮院世燭馬羣遙輦世燭南北府國舅帳郎君
官爲敝史諸部宰相節度使帳爲司空二室常闥林爲
僕射鷹坊監冶等局官長爲詳穩十二月戊戌遣同括
阿鉢等使晉制加晉馮道守太傅劉煦守太保餘官各
有差

二年春正月乙巳以受晉冊遣使報南唐高麗丁未御
開皇殿宴晉使馮道以下賜物有差戊申晉遣金吾衛
大將軍馬從斌考功郎中劉知新來貢珍幣命分賜羣
臣丙辰晉遣使謝免汭邊四州錢幣二月戊寅宴諸王
及節度使來賀受冊禮者仍命皇太子惕隱迪輦餞之

癸巳謁太祖廟賜在京吏民物及內外羣臣官賞有差
丁酉加兼侍中左金吾衛上將軍王鄧檢校太尉三月
改于襄潭之側戊申女直來貢丁巳封皇子述律爲壽
安王菴撒葛爲太平王巳巳大賚百姓夏四月乙亥幸
木葉山癸巳東京路奏狼食人五月乙巳禁南京鬻牝
羊出境思奴古多里等坐盜官物籍其家南唐遣使來
貢丁未以所貢物賜羣臣戊申回鶻單于使人乞授官
詔第加刺史縣令六月丁丑雨雪是夏駐蹕頻蹕淀秋
七月戊申晉遣使進犀帶庚戌吐谷渾來貢乙卯敝史
阿鉢坐奉使失職命笞之閏月癸未乙室大王坐賦調

不均以木劍背撻而釋之并罷南北府民上供及宰相
節度諸賦役非舊制者乙酉遣的烈賜晉烏古良馬巳
丑以南王府二刺史貪蠹各杖一百仍繫虞候帳備射
鬼箭選羣臣爲民所愛者代之八月乙丑晉遣使貢歲
幣奏輸戌亥二歲金幣于燕京九月甲戌阻卜阿离底
來貢巳卯遣使使晉冬十月丁未上以烏古部水草肥
美詔北南院徙三石烈戶居之十一月丁亥鐵驪燉煌
竝遣使來貢十二月庚子釣魚于土河甲子回鶻使者
僣人有以刃相擊者詔付其使處之

三年春正月戊子吳越王遣使來貢庚寅人皇王妃來

朝回鶻使乞觀諸國使朝見禮從之壬辰遣陪謁阿鉢使晉致生辰禮晉以并鎮忻代之吐谷渾來歸二月巳亥奚王勞骨寧率六節度使朝貢庚子烏古遣使獻伏鹿國俘賜其部夷离董旗鼓以旌其功壬寅女直來貢辛亥墨離鶻末里使回鶻阿薩蘭還賜對衣勞之乙卯鴨渌江女直遣使來覲三月戊辰遣使使晉報幸南京巳巳如南京辛未命惕隱耶律涅离骨德率萬騎先驅壬申次石嶺以奚王勞骨寧監軍寅你巳朝謁不時切責之丙子魯不姑上党項俘獲數癸未獵水門獲白鹿庚寅詔扈從擾民者從軍律甲午幸薊州乙未晉及南

唐各遣使來覲夏四月庚子至燕備法駕入自拱辰門御元和殿行入閣禮壬寅遣人使晉乙巳幸留守趙延壽別墅丙午晉遣宣徽使楊端王眺等來問起居壬子御便殿宴晉及諸國使丙辰晉遣使進茶藥壬戌御昭慶殿宴南京羣臣癸亥晉遣使賀端午以所進節物賜羣臣乙丑南唐進白龜五月庚午以端午宴羣臣及諸國使命回鶻燉煌二使作本俗舞俾諸使觀之庚辰晉遣使進弓矢甲申遣皇子天德及檢校司徒邸用和使晉戊子閱騎兵于南郊六月乙未朔東京宰相耶律羽之言渤海相大素賢不法詔僚佐部民舉有才德者代

之丙申閱步卒于南郊庚子晉及轄刺骨只遣使來見
壬寅駕發燕京命中書令蕭僧隱部諸道軍于長坐營
癸丑次奉聖州甲寅勞軍士秋七月己巳獵狷底烈山
癸酉朝于皇太后丙子從皇太后視人皇王妃疾戊寅
人皇王妃蕭氏薨己卯以安重榮據鎮州叛晉詔征南
將軍柳巖邊備丙戌徙人皇王行宮于其妃薨所辛卯
晉遣使請行南郊禮許之八月己亥詔東丹吏民爲其
王倍妃蕭氏服庚子阻卜來貢壬寅遣使南唐乙巳阻
卜黑車子室韋賃烈等國來貢南唐遣使求青氊帳賜
之戊申以安端私城爲白川州辛亥鼻骨德使乞賜爵

以其國相授之甲寅阻卜來貢乙卯置白川州官屬丙
辰詔以于諧里河臚胸河之近地給賜南院歐董突呂
乙斯勃北院温納何刺三石烈人爲農田九月庚午侍
中崔窮古言晉主聞陛下數游獵意請節之上曰朕之
畋獵非徒從樂所以練習武事也乃詔諭之壬午邊將
奏破吐谷渾擒其長詔止誅其首惡及其丁壯餘竝釋
之丙戌晉遣使貢名馬戊子女直及吳越王遣使來貢
冬十月辛丑遣剋朗使吳越畧姑使南唐庚申晉遣使
貢布及請親祠南嶽從之十一月己巳南唐遣使奉蠟
丸書言晉密事丁丑詔有司教民播種紡績除姊亡妹

續之法十二月壬辰朔率百僚謁太祖行宮甲午燔柴
禮畢祠于神帳丙申遣使使晉丙辰詔契丹人授漢官
者從漢儀聽與漢人婚姻丁巳詔燕京皇城西南堞建
涼殿是冬駐蹕于傘淀

四年春正月壬戌以乙室品卑突軌三部鰥寡不能自
存者官爲之配丙子南唐遣使來貢庚辰涅刺烏隗部
獻党項俘獲數已丑詔定征党項功二月丙申皇太子
獲白麀甲辰晉遣使進香藥丙子鐵驪來貢丁巳詔有
司編始祖奇首可汗事迹已未晉遣楊彥詢來貢且言
鎮州安重榮跋扈狀遂留不遣是月晉鎮州安重榮執

遼使者找刺三月特授回鶻使闕里于越并賜旌旗弓
劍衣馬餘賜有差癸酉晉以許祀南郊遣使來謝進黃
金十鎰夏四月巳卯晉遣使進櫻桃五月庚辰吐谷渾
夷离董蘇等叛入晉遣牒蠟往諭晉及太原守臣六月
辛卯振武軍節度副使趙崇逐其節度使耶律畫里以
朔州叛附晉丙午命宣徽使裏古只赴朔州以兵圍其
城有晉使至請開壁卽勿聽驛送闕下秋七月癸亥南
唐遣使奉蠟丸書丙寅裏古只奏請遣使至朔令降守
者猶堅壁弗納且言晉有貢物命卽以所貢物賜攻城
將校巳巳有司奏神蠱車有蜂巢成蜜史占之吉壬申

晉遣使進水晶硯八月癸巳南唐奉蠟丸書庚子晉遣使進犀弓竹矢吳越王遣使奉蠟丸書九月壬申有星孛于晉分丁丑幸歸化州冬十月辛丑有司奏燕薊大熟癸卯吳越王遣使來貢十一月丙寅晉以討安重榮來告庚午吐谷渾請降遣使撫諭阻卜來貢以其物賜左右丙子鴨渌江女直來貢壬午以永寧天授二節及正旦重午冬至臘竝受賀著令十二月戊子晉遣使來告山南節度使安從進反詔以便宜討之庚寅南唐遣使奉蠟丸書戊戌晉遣王升鸞來貢戊申晉以敗安重榮來告遂遣楊彥詢歸辛亥晉遣使乞罷戍兵詔惕隱

朔古班師甲寅攻拔朔州遣控鶴指揮使諧里勞軍時
裹古只戰歿城下上怒命誅城中丁壯仍以叛民上戶
三十爲裹古只部曲

五年春正月丙辰朔上在歸化州御行殿受羣臣朝以
諸道貢物進太后及賜宗室百僚戊午詔求直言北王
府郎君耶律海思應詔召對稱旨特授宣徽使詔政事
令僧隱等以契丹戶分屯南邊戊辰晉函安重榮首來
獻上數欲親討重榮至是乃止癸酉遣使使晉是月晉
以朔州平請使來賀遂遣客省使耶律化哥使晉并致
生辰禮二月壬辰上將南幸以諸路有未平者召太子

通鑑卷四
及羣臣議皆曰今襄鎮朔三州雖已平然吐谷渾爲安
重榮所誘猶未歸命宜發兵討之以警諸部上曰正與
朕合遂詔以明王隈恩代于越信恩爲西南路招討使
以討之且諭明王宜先練習邊事而後之官甲午如南
京遣使使晉索吐谷渾叛者乙未鼻骨德來貢三月乙
卯朔晉遣齊州防禦使宋暉業翰林茶酒使張言來問
起居閏月駐蹕陽門夏四月甲寅朔鐵驪來貢以其物
分賜羣臣丙子晉遣使進射柳鞍馬五月五日戊午禁
屠宰六月癸丑朔晉齊王重貴遣使來貢丁巳徒觀古
素撒來貢乙丑晉王敬瑭殂子重貴立戊辰晉遣使告

哀輟朝七日庚午遣使往晉弔祭丁丑聞皇太后不豫
上馳入侍湯藥必親嘗仍告太祖廟幸菩薩堂飯僧五
萬人七月乃愈秋七月庚寅晉遣金吾衛大將軍梁言
判四方館事朱崇節來謝書稱孫不稱臣遣客省使喬
榮讓之景延廣答曰先帝則聖朝所立今主則我國自
冊爲鄰爲孫則可奉表稱臣則不可榮還具奏之上始
有南伐之意辛卯阻卜鼻骨德烏古來貢將軍闔德里
蒲骨等率降將轄德至闕并獻所獲丁未晉遣使以祖
母哀來告八月辛酉女直阻卜烏古各貢方物甲子晉
復襄州戊辰詔河東節度使劉知遠送叛臣烏古指揮

使由燕京赴闕癸酉遣天城軍節度使蕭拜石弔祭于
晉九月壬辰遣使賀晉帝嗣位冬十月己巳徵諸道兵
遣將軍密骨德伐党項十一月己未武定軍奏松生棗
十二月癸亥晉遣使來謝是冬駐蹕赤城

六年春二月乙卯晉遣使進先帝遺物辛酉晉遣使請
居汴從之三月己卯朔吳越王遣使來貢甲申梅里喘
引來歸戊子南唐遣使奉蠟丸書丁未晉至汴遣使來
謝夏四月戊申朔日有食之五月己亥遣使如晉致生
辰禮六月丁未朔鐵驪來貢己未奚鋤骨里部進白麝
辛酉莫州進白鵲晉遣使貢金秋八月丁未朔晉復貢

金己未如奉聖州晉遣其子延煦來朝冬十一月辛卯
上京留守耶律迪輦得晉諜知有二心甲辰鐵驪來貢
十二月丁未如南京議伐晉命趙延壽趙延昭安端解
里等由滄恒易定分道而進大軍繼之是歲楊彥昭請
移鎮柰灤及新鎮從之

七年春正月甲戌朔趙延壽延昭率前鋒五萬騎次任
丘丙子安端入鴈門圍忻代己卯趙延壽圍貝州其軍
校邵珂開南門納遼兵太守吳巒投井死己丑次元城
授延壽魏博等州節度使封魏王率所部屯南樂丙申
遣兵攻黎陽晉張彥澤來拒辛丑晉遣使來修舊好詔

割河北諸州及遣桑維翰景延廣來議二月甲辰攻博
州刺史周儒以城降晉平盧軍節度使楊光遠密道遼
師自馬家口濟河晉將景延廣命石斌守麻家口白再
榮守馬家口未幾周儒引遼軍麻荅營于河東攻鄆州
北津以應光遠晉遣李守貞皇甫遇梁漢璋薛懷讓將
兵萬人緣河水陸俱進遼軍圍晉別將于戚城晉主自
將救之遼師解去守貞等至馬家口麻荅遣步卒萬人
築營壘騎兵萬人守於外餘兵屯河西渡未已晉兵薄
之遼軍不利三月癸酉朔趙延壽言晉諸軍汾河置柵
皆畏却不敢戰若率大兵直抵澶淵據其橋梁晉必可

取是日晉兵駐澶淵其前軍高行周在戚城乃命延壽
延昭以數萬騎出行周右上以精兵出其左戰至暮上
復以勁騎突其中軍晉軍不能戰會有謀者言晉軍東
面數少汾河城柵不固乃急擊其東偏眾皆奔潰縱兵
追及遂大敗之壬午留趙延昭守貝州徙所俘戶于內
地夏四月癸丑還次南京辛未如涼陘五月癸酉耶律
拔里得奏破德州擒刺史尹居藩及將吏二十七人六
月甲辰黑車子室韋來貢乙巳紕沒里要里等國來貢
秋七月己卯晉楊光遠遣人奉蠟丸書辛卯晉遣張暉
奉表乞和留暉不遣八月辛酉回鶻遣使請婚不許是

月晉鎮州兵來襲飛狐大同軍節度使耶律孔阿戰敗
之九月庚午朔北幸十月丁未鼻骨德來貢壬戌天授
節諸國進賀惟晉不至十一月壬申詔徵諸道兵以閏
月朔會溫榆河北十二月癸卯南伐甲子次古北口閏
月己巳朔閱諸道兵於溫榆河己卯圍恒州下其九縣
八年春正月庚子分兵攻邢洺磁三州殺掠殆盡入鄴
都境張從恩馬全節安審琦兵悉陳于相州安陽水之
南皇甫遇與濮州刺史慕容彥超將兵千騎來覘遼軍
至鄴都遇遼軍數萬且戰且却至榆林店遼軍繼至遇
與彥超力戰百餘合遇馬蹙步戰審琦引騎兵踰水以

救遼軍乃還二月圍魏晉將杜重威率兵來救戊子晉
將折從阮陷滕州三月戊戌師拔邠州殺其刺史沈斌
庚戌杜重威李守貞攻秦州戊子趙延壽率前鋒薄秦
城己未重威守貞引兵南遁追至陽城大敗之復以步
卒爲方陣來拒與戰二十餘合壬戌復搏戰十餘里癸
亥圍晉兵于白團衛村晉兵下鹿角爲營是夕大風至
曙命鐵鷁軍下馬拔其鹿角奮短兵入擊順風縱火揚
塵以助其勢晉軍大呼曰都招討何不用兵令士卒徒
死諸將皆奮出戰張彥澤藥元福皇甫遇出兵大戰諸
將繼至遼軍却數百步風益甚晝晦如夜符彥卿以萬

騎橫擊遼軍率步卒竝進遼軍不利上乘奚車退十餘里晉追兵急獲一橐駝乘之乃歸晉兵退保定州夏四月甲申還次南京杖戰不力者各數百庚寅宴將士於元和殿癸巳如涼陁六月戊辰回鶻來貢辛未吐谷渾鼻骨德皆來貢辛巳黑車子室韋來貢丁亥趙延壽奏晉兵襲高陽戍將擊走之秋七月乙卯獵平地松林晉遣孟守中奉表請和仍以前事荅之八月巳巳詔侍衛蕭素撒閱羣牧于北陁九月壬寅次赤山宴從臣問軍國要務對曰軍國之務愛民爲本民富則兵足兵足則國強上以爲然辛酉還上京冬十月辛未祠木葉山十

一月戊戌女直鐵驪來貢十二月癸亥朔朝謁太祖行宮乙丑雲州節度使耶律孔阿獲晉謀者戊辰臘賜諸國貢使衣馬

九年春正月庚子回鶻來貢丁未女直來貢二月戊辰鼻骨德奏軍籍三月巳亥吐谷渾遣軍校恤烈獻生口千戶授恤烈檢校司空夏四月辛酉朔吐谷渾白可久來附是月如涼陁五月庚戌晉易州戍將孫方簡請內附六月戊子謁祖陵更闕神殿爲長思秋七月辛亥詔徵諸道兵故傷禾稼者以軍法論癸丑女直來貢乙卯以阻卜酋長曷刺爲本部夷離董八月丙寅烏古來貢

是月自將南伐九月壬辰閱諸道兵于漁陽西棗林淀
是月趙延壽與晉張彥澤戰于定州敗之十一月戊子
朔進圍鎮州丙申先遣候騎報晉兵至遣精兵斷河橋
晉兵退保武強南院大王迪輦將軍高模翰分兵由瀛
州間道以進杜重威遣其將節度使梁漢璋率衆來拒
與戰大敗之殺梁漢璋杜重威張彥澤引兵據中渡橋
趙延壽以步卒前擊高彥溫以騎兵乘之追奔逐北殪
屍數萬斬其將王清宋彥筠墮水死重威等退保中渡
寨義武軍節度使李穀以城降遂進兵夾滹沱而營去
中渡寨三里分兵圍之夜則列騎環守晝則出兵抄掠

復命大內楊隱耶律朔骨里及趙延壽分兵圍守自將
騎卒夜渡河出其後攻下欒城降騎卒數千分遣將士
據其要害下令軍中預備軍食三日不得舉煙火但獲
晉人卽黥而縱之諸饋運見者皆棄而走於是晉兵內
外隔絕食盡勢窮十二月丙寅杜重威李守貞張彥澤
等率所部二十萬衆來降上擁數萬騎臨大阜立馬以
受之授重威守太傅鄴都留守守貞天平軍節度使餘
各領舊職分降卒之半付重威半以隸趙延壽命御史
大夫解里監軍傅桂兒張彥澤持詔入汴諭晉帝母李
氏以安其意且召桑維翰景延廣先來留騎兵千人守

魏自率大軍而南壬申解里等至汴晉帝重貴素服拜命輿母李氏奉表請罪初重貴絕和好維翰數諫止之不從至是彥澤殺維翰給言自經死詔收葬之復其田園地宅仍厚恤其家甲戌彥澤遷重貴及其母若妻於開封府署以控鶴指揮使李榮督兵衛之壬午次赤岡重貴舉族出封丘門橐索牽羊以待上不忍臨視命改館封禪寺晉百官縞衣紗帽俯伏待罪上曰其主負恩其臣何罪命領職如故卽授安叔千金吾衛上將軍叔千出班獨立上曰汝邢州之請朕所不忘乃加鎮國軍節度使蓋在邢嘗密請內附也將軍康祥執景延廣來

獻詔以牙籌數其罪凡八繫送都道自殺

大同元年春正月丁亥朔備法駕入汴御崇元殿受百官賀戊子以樞密副使劉敏權知開封府殺秦繼旻李彥紳及鄭州防禦使楊承勳以其弟承信爲平盧軍節度使襲父爵初楊光遠在青州求內附其子承勳不聽殺其判官丘濤及弟承祚等自歸于晉故誅之己丑以張彥澤擅徙重貴開封殺桑維翰縱兵大掠不道斬於市晉人鬻食之辛卯降重貴爲崇祿大夫檢校太尉封負義侯癸巳以張礪爲平章事晉李崧爲樞密使馮道爲太傅和凝爲翰林學士趙瑩爲太子太保劉煦守太

保馮玉爲太子少保癸卯遣趙瑩馮玉李彥韜將三百
騎送負義侯及其母李氏缺妃缺氏妻馮氏弟重睿子
延煦延寶等于黃龍府安置仍以其宮女五十人內宦
三人東西班五十人醫官一人控鶴四人庖丁七人茶
酒司三人儀鸞三人健卒十人從之二月丁巳朔建國
號大遼大赦改元大同升鎮州爲中京以趙延壽爲大
丞相兼政事令樞密使中京留守中外官僚將士爵賞
有差辛未河東節度使北平王劉知遠自立爲帝國號
漢詔以耿崇美爲昭義軍節度使高唐英爲昭德軍節
度使崔廷勳爲河陽軍節度使分據要地三月丙戌朔

以蕭翰爲宣武軍節度使賜將吏爵賞有差壬寅晉諸
司僚吏嬪御宦寺方技百工圖籍曆象石經銅人明堂
刻漏太常樂譜諸宮縣鹵簿法物及鎧仗悉送上京磁
州帥梁暉以相州降漢已酉命高唐英討之夏四月丙
辰朔發自汴州以馮道李崧和凝李澣徐台符張礪等
從行次赤岡夜有聲如雷起於御幄大星復隕於旗鼓
前乙丑濟黎陽渡顧謂侍臣曰朕此行有三失縱兵掠
芻粟一也括民私財二也不遽遣諸節度還鎮三也皇
太弟遣使問軍前事上報曰初以兵二十萬降杜重威
張彥澤下鎮州及入汴視其官屬具員者省之當其才

者任之司屬雖存官吏廢墮猶雛飛之後徒有空巢久
經離亂一至於此所在盜賊屯結土功不息餽餉非時
民不堪命河東尚未歸命西路酋帥亦相黨附夙夜以
思制之之術惟推心庶僚和協軍情撫綏百姓三者而
已今所歸順凡七十六處得戶一百九萬百一十八非
汴州炎熱水土難居止得一年太平可指掌而致且改
鎮州爲中京以備巡幸欲伐河東姑俟別圖其槩如此
戊辰次高邑不豫丁丑崩于樂城年四十六是歲九月
壬子朔葬于鳳山陵曰懷陵廟號太宗統和二十六年
七月上尊諡孝武皇帝重熙三十一年九月增諡孝武

惠文皇帝

贊曰太宗甫定多方遠近向化建國號備典章至於釐
庶政閱名實錄囚徒教耕織配鰥寡求直言之士得郎
君海思卽擢宣徽嘉唐張敬達忠於其君卒以禮葬輟
遊豫而納三剋之請憫士卒而下休養之令親征晉國
重貴面縛斯可謂威德兼弘英畧間見者矣入汴之後
無幾微之驕有三失之訓傳稱鄭伯之善處勝書進秦
誓之能悔過太宗蓋兼有之其卓矣乎

遼史卷四終

遼史卷五

本紀第五

元開府儀同三司上柱國前中書右丞相兼修國史都總裁脫脫修
皇明奉訓大夫右春坊右諭德兼翰林院侍講署國子監事臣沈淮等
奉

勅重校刊

世宗一

世宗孝和莊憲皇帝諱阮小字元欲讓國皇帝長子母
柔貞皇后蕭氏帝儀觀豐偉內寬外嚴善騎射樂施予
人望歸之太宗愛之如子會同九年從伐晉太同元年
二月封永康王四月丁丑太宗崩於樂城戊寅梓宮次

鎮陽卽皇帝位於樞前甲申次定州命天德朔古解里等護梓宮先赴上京太后聞帝卽位遣太弟李胡率兵拒之六月甲寅朔次南京五院夷离董安端詳穩劉哥遣人馳報請爲前鋒至泰德泉遇李胡軍戰敗之上遣郎君勤德等詣兩軍諭解秋閏七月次潢河太后李胡整兵拒於橫渡相持數日用屋質之謀各罷兵趨上京旣而聞太后李胡復有異謀遷于祖州誅司徒劃設及楚補里八月壬午朔尊母蕭氏爲皇太后以太后族刺只撒古魯爲國舅帳立詳穩以總焉以崇德宮戶分賜翼戴功臣及北院大王洼南院大王吼各五十安搏楚

補各百的魯鐵刺子孫先以非罪籍沒者歸之癸未始置北院樞密使以安搏爲之九月壬子崩葬嗣聖皇帝於懷陵丁卯行柴冊禮羣臣上尊號曰天授皇帝大赦改大同元年爲天祿元年追諡皇考曰讓國皇帝以安端主東丹國封明王察割爲泰寧王劉哥爲惕隱高勳爲南院樞密使

二年春正月天德蕭翰劉哥益都等謀反誅天德杖蕭翰遷劉哥於邊罰益都使轄戛斯國漢王劉知遠殂子承祐立夏四月庚辰朔南唐遣李朗王祚來慰且賀兼奉蠟丸書議攻漢秋七月壬申皇子賢生冬十月壬午

南京留守魏王趙延壽薨以中臺省右相牒螭爲南京留守封燕王十一月駐蹕彰武南

三年春正月蕭翰及公主阿不里謀反翰伏誅阿不里瘦死獄中庚申肆赦內外官各進一階夏六月戊寅以敝史耶律胡離軫爲北院大王己卯惕隱顏昱封漆水郡王秋九月辛丑朔召羣臣議南伐冬十月遣諸將率兵攻下貝州高老鎮狗地鄴都南宮堂陽殺深州刺史史萬山俘獲甚衆

四年春二月辛未泰寧王察割來朝留侍是月建政事省三月戊戌朔南唐遣趙延嗣張福等來賀南征捷秋

九月乙丑朔如山西冬十月自將南伐攻下安平內丘束鹿等城大獲而還是歲冊皇后蕭氏

五年春正月癸亥朔如百泉湖漢郭威弒其主自立國號周遣朱憲來告卽遣使致良馬漢劉崇自立於太原二月周遣姚漢英華昭胤來以書辭抗禮留漢英等夏五月壬戌朔太子太傅趙瑩薨輟朝一日命歸葬于汴詔州縣錄事叅軍主簿委政事省銓注六月辛卯朔劉崇爲周所攻遣使稱姪乞援且求封冊卽遣燕王牒螭樞密使高勳冊爲大漢神武皇帝南唐遣蔣洪來乞舉兵應援是夏清暑百泉嶺九月庚申朔自將南伐壬戌

次歸化州祥古山癸亥祭讓國皇帝于行宮羣臣皆醉
察割反帝遇弒年三十四應曆元年葬於顯州西山陵
曰顯陵二年諡孝和皇帝廟號世宗統和二十六年七
月加諡孝和莊憲皇帝
贊曰世宗中才之主也入繼大統曾未三年納唐丸書
卽議南伐旣乏持重宜乖周防蓋有致禍之道矣然而
孝友寬慈亦有君人之度焉未及師還變起沉湎豈不
可哀也哉

遼史卷五終

遼史卷六

本紀第六

元開府儀同三司上柱國前中書右丞相兼修國史都總裁脫脫修
皇明奉訓大夫右春坊右諭德兼翰林院侍講署國子監事臣沈淮等
奉

勅重校刊

穆宗一

穆宗孝安敬正皇帝諱璟小字迷律太宗皇帝長子母
曰靖安皇后蕭氏會同二年封壽安王天祿五年九月
癸亥世宗遇害逆臣察割等伏誅丁卯卽皇帝位羣臣
上尊號曰天順皇帝改元應曆戊辰如南京是月遣劉

承訓告哀于漢冬十一月漢周南唐各遣使來弔乙亥
詔朝會依嗣聖皇帝故事用漢禮十二月甲辰漢遣使
獻弓矢鞍馬壬子鐵驪鼻骨德皆來貢

二年春正月戊午朔南唐遣使奉蠟丸書及進犀兕甲
萬屬壬戌太尉忽古質謀逆伏誅二月癸卯女直來貢
三月癸亥南唐遣使奉蠟丸書丁卯復遣使來貢甲申
以耶律撻烈爲南院大王夏四月丙戌朔日有食之己
亥鐵驪進鷹鵠五月丙辰朔視朝壬午南唐遣使來貢
六月壬辰國舅政事令蕭眉古得宣政殿學士李澣等
謀南奔事覺詔暴其罪乙未祭天地壬寅漢爲周所侵

遣使求援命中臺省右相高模翰赴之丁未命乳媪之
兄曷魯世爲阿速石烈夷离董秋七月乙亥政事令婁
國林牙敵烈侍中神都郎君海里等謀亂就戮八月己
丑眉古得婁國等伏誅杖李澣而釋之九月甲寅朔雲
州進嘉禾四莖二穗戊午詔以先平察割日用白黑羊
玄酒祭天歲以爲常壬戌獵炭山祭天庚辰敵烈部來
貢冬十月甲申朔漢遣使進葡萄酒甲午司徒老古等
獻白雉戊申回鶻及轄戛斯皆遣使來貢十一月癸丑
朔視朝己巳地震己卯日南至始用舊制行拜日禮朔
州民進黑兔十二月癸未朔高模翰及漢兵圍晉州辛

卯以生日飯僧釋繫囚甲辰獵于近郊祀天地辛亥明
王安端薨

三年春閏正月壬午朔漢以高模翰却周軍遣使來謝
二月辛亥朔詔用嗣聖皇帝舊璽甲子太保敵烈脩易
州城鎮州以兵來挑戰却之三月庚辰朔南唐遣使來
貢因附書于漢詔達之庚寅如應州擊鞠丁酉漢遣使
進毬衣及馬庚子觀漁于神德湖夏四月庚申鐵驪來
貢五月壬寅漢遣使言石晉樹先帝聖德神功碑爲周
人所毀請再刻許之六月丁卯應天皇太后崩秋七月
不視朝八月壬子以生日釋囚己未漢遣使求援三河

烏古吐蕃吐谷渾鼻骨德皆遣使來貢九月庚子漢遣
使貢藥冬十月己酉命太師唐骨德治大行皇太后園
陵李胡子宛郎君嵇幹敵烈謀反事覺辭逮太平王罽
撒葛林牙華割郎君新羅等皆執之十一月辛丑諡皇
太后曰貞烈葬祖陵漢遣使來會冬駐蹕奉聖州以南
京水詔免今歲租

四年春正月戊寅回鶻來貢己丑華割嵇幹等伏誅宛
及罽撒葛皆釋之是月周主威殂養子晉王柴榮嗣立
二月丙午朔周攻漢命政事令耶律敵祿援之丙辰漢
遣使進茶藥幸南京夏五月乙亥忻代二州叛漢遣南

院大王撻烈助敵祿討之丁酉撻烈敗周將符彥卿於
忻口六月癸亥撻烈獻所獲秋七月乙酉漢民有爲遼
軍誤掠者遣使來請詔悉歸之九月丙申漢爲周人所
侵遣使來告冬十一月彰國軍節度使蕭敵烈太保許
從贇奏忻代二州撻十二月辛酉朔謁祖陵庚午漢遣
使來貢是冬駐蹕杏嶠

五年春正月辛未朔鼻骨德來貢二月庚子朔日有食
之庚申漢遣使請上尊號不許壬戌如裏潭夏四月巳
酉周侵漢漢遣使求援癸丑命郎君蕭海黎世爲北府
宰相秋九月庚辰漢主有疾遣使來告冬十月壬申女

直來貢丁亥謁太宗廟庚寅南唐遣使來貢十一月乙
未朔漢主崇殂子承鈞遣使來告且求嗣立遣使弔祭
遂封冊之十二月乙丑朔謁太祖廟辛巳漢遣使來議
軍事

六年夏五月丁酉謁懷陵六月甲子漢遣使來議軍事
秋七月不視朝九月戊午謁祖陵冬十一月壬寅鼻骨
德來貢十二月巳未朔謁太祖廟

七年春正月庚子鼻骨德來貢二月辛酉南唐遣使奉
蠟丸書辛未駐蹕潢河夏四月戊午朔還上京初女巫
肖古上延年藥方當用男子膽和之不數年殺人甚多

至是覺其妄辛巳射殺之五月辛卯漢遣使來貢六月
丙辰周遣使來聘南唐遣使來貢八月巳未周遣使來
聘是秋不聽政冬十月庚申獵于七鷹山十二月丁巳
詔大臣曰有罪者法當刑朕或肆怒濫及無辜卿等切
諫無或面從辛巳還上京

八年春二月乙丑駐蹕潢河夏四月甲寅南京留守蕭
思溫攻下沿邊州縣遣人勞之五月周陷東城縣六月
辛未蕭思溫請益兵乞駕幸燕秋七月獵于拽刺山迄
于九月射鹿諸山不視朝冬十一月辛酉漢遣使來告
周復來侵乙丑使再至十二月庚辰又至

九年春正月戊辰駐蹕漢河夏四月丙戌周來侵戊戌
以南京留守蕭思溫爲兵馬都總管擊之是月周拔益
津瓦橋淤口三關五月乙巳朔陷瀛莫二州癸亥如南
京辛未周兵退六月乙亥朔視朝戊寅復容城縣庚申
西幸如懷州是月周主榮殂子宗訓立秋七月發南京
軍戍范陽冬十二月戊寅還上京庚辰王子敵烈前宣
徽使海思及蕭達干等謀反事覺鞫之辛巳祀天地祖
考告逆黨事敗丙申召羣臣議時政

十年春正月周殿前都點檢趙匡胤廢周自立建國號
宋夏五月乙巳謁懷陵壬子漢以潞州歸附來告丙寅

至自懷陵六月庚申漢以宋兵圍石州來告遣大同軍節度使阿剌率四部往援詔蕭思溫以三部兵助之秋七月己亥朔宋兵陷石州潞州復叛漢使來告辛酉政事令耶律壽遠太保楚阿不等謀反伏誅以酒脯祀天地于黑山八月如秋山幸懷州庚午以鎮茵石後復擊殺近侍古哥冬十月丙子李胡子喜隱謀反辭連李胡下獄死十一月海思獄中上書陳便宜

十一年春二月丙寅釋喜隱辛亥司徒烏里只子迭刺哥誣告其父謀反復詐乘傳及殺行人以其父請杖而釋之丙辰蕭思溫奏老人星見乞行赦宥閏月甲子如

潢河夏四月癸巳朔日有食之是月射鹿不視朝五月乙亥司天王白李正等進曆六月甲午赦冬十一月歲星犯月

十二年春正月甲戌夜觀燈二月己丑朔以御史大夫蕭護思爲北院樞密使賜對衣鞍馬夏五月庚午以旱命左右以水相沃頃之果雨六月甲午祠木葉山及潢河秋如黑山赤山射鹿

十三年春正月自丁巳晝夜酣飲者九日丙寅宋欲城益津關命南京留守高勳統軍使崔延勳以兵擾之癸酉殺獸人海里二月庚寅漢遣使來告欲巡邊徵乞張

聲援壬辰如潢河癸巳觀羣臣射賜物有差乙巳老人
星見三月癸丑朔殺鹿人彌里吉梟其首以示掌鹿者
夏四月壬寅獵于潢河五月壬戌幹朗改國所進花鹿
生麝六月癸未近侍傷獐杖殺之甲申殺獐人霞馬壬
辰詔諸路錄囚秋七月辛亥朔漢以宋侵來告乙丑薦
時羞於廟八月甲申以生日縱五坊鷹鷂戊戌幸近山
呼鹿射之旬有七日而後返九月庚戌朔以青牛白馬
祭天地飲于野次終夕乃罷辛亥以酒脯祭天地復終
夜酣飲冬十月丙申漢以宋侵來告十一月庚午獵飲
于虞人家凡四日十二月戊子射野鹿賜虞人物有

差庚寅殺蔬人曷主

遼史卷六終

遼史卷七

本紀第七

元開府儀同三司上柱國前中書右丞相兼修國史都總裁脫脫修
皇明奉訓大夫右春坊右諭德兼翰林院侍講署國子監事臣沈淮等
奉

勅重校刊

穆宗一

十四年春正月戊寅朔奉安神燾戊戌漢以宋將來襲
馳告二月壬子詔西南面招討使撻烈進兵援漢癸亥
如潢河戊辰支解鹿人没荅海里等七人于野封土識
其地已巳如老林東灤壬申漢以敗宋兵石州來告夏

四月丁巳漢以擊退宋軍遣使來謝是月黃龍府甘露
降五月射舐鱗鹿于白鷹山至于浹旬六月丙午朔獵
于玉山竟月忘返秋七月壬辰以酒脯祀黑山八月乙
巳如磴子嶺呼鹿射之獲鹿四賜虞人女瓌等物有差
丁未還宮戊申以生日值天赦不受賀曲赦京師囚乙
卯錄囚九月黃室韋叛冬十月丙午近侍烏古者進石
錯賜白金二百五十兩丙辰以掌鹿矧思代幹里爲開
撒狝賜金帶金盞銀二百兩所隸死罪以下得專之十
一月壬午日南至宴飲達旦自是晝寢夜飲殺近侍小
六於禁中十二月丙午以黑兔祭神烏古叛掠民財畜

詳穩僧隱與戰敗績僧隱及乙實等死之

十五年春正月己卯以樞密使雅里斯爲行軍都統虎
軍詳穩楚思爲行軍都監益以突呂不部軍三百合諸
部兵討之烏古夷離董子勃勒底獨不叛詔褒之是月
老人星見二月壬寅朔日有食之上東幸甲寅以獲鴨
除鷹坊刺面腰斬之刑復其徭役是月烏古殺其長宰
離底餘衆降復叛三月癸酉近侍東兒進七筋不時手
刃刺之丁丑大黃室韋酋長寅尼吉叛癸未五坊人四
十戶叛入烏古癸巳虞人沙刺迭偵鵝失期加炮烙鐵
梳之刑而死夏四月乙巳小黃室韋叛雅里斯楚思等

擊之爲室韋所敗遣使詰之乙卯以禿里代雅里斯爲
都統以女古爲監軍率輕騎進討仍令撻馬尋吉里持
詔招諭五月壬申尋吉里奏諭之不從雅里斯以撻凜
蘇二羣牧兵追至柴河與戰不利甲申庫古只奏室韋
長寅尼吉亡入敵烈六月辛亥俞魯古獻良馬賜銀二
千兩以近侍忽刺比馬至先以聞賜銀千兩是月敵烈
來降秋七月甲戌雅里斯奏烏古至河德灤遣夷離董
晝里夷離畢常思擊之丁丑烏古掠上京北榆林峪居
民遣林牙蕭幹討之庚辰雅里斯等與烏古戰不利十
月丁未常思與烏古戰敗之十二月甲辰以近侍喜哥

私歸殺其妻丁未殺近侍隨魯駐蹕黑山平淀

十六年春正月丁卯朔被酒不受賀甲申微行市中賜
酒家銀絹乙酉殺近侍白海及家僕衫福押刺葛樞密
使門吏老古撻馬失魯三月巳巳東幸庚午獲鴨甲申
獲鵝皆飲達旦五月甲申以歲旱泛舟于池禱雨不雨
捨舟立水中而禱俄頃乃雨六月丙申以白海死非其
罪賜其家銀絹秋七月壬午諭有司凡行幸之所必高
立標識令民勿犯違以死論八月丁酉漢遣使貢金器
鎧甲閏月乙丑觀野鹿入馴鹿羣立馬飲至晡九月庚
子以重九宴飲夜以繼日至壬子乃罷巳未殺狼人褻

里十月庚辰漢王有母喪遣使賻弔十二月甲子幸酒
人拔刺哥家復幸殿前都點檢耶律夷曠葛第宴飲連
日賜金盃細錦及孕馬百疋左右授官者甚衆戊辰漢
遣使來貢是冬駐蹕黑山平淀

十七年春正月庚寅朔林牙蕭幹郎君耶律賢適討烏
古還帝執其手賜卮酒授賢適右皮室詳穩雅里斯楚
思霞里三人賜醕酒以辱之乙卯夷離畢骨欲獻烏古
俘二月甲子高勳奏宋將城益津關請以偏師擾之土
從之夏四月戊辰殺鷹人敵魯丙子射柳祈雨復以水
沃羣臣五月辛卯殺鹿人札葛壬辰北府宰相蕭海黎

薨輟朝罷重五宴六月己未支解雉人壽哥念古殺鹿
人四十四人是夏駐蹕裏潭秋八月辛酉生日以政事
令阿不底病亟不受賀九月自丙戌朔獵于黑山赤山
至于月終冬十月乙丑殺酒人粹侏十一月辛卯殺近
侍廷壽壬辰殺豕人阿不禮曷魯木里者涅里括庚子
司天臺奏月當食不虧上以爲祥歡飲達旦壬寅殺鹿
人唐果直哥撒刺十二月辛未手殺襄人海里復巒之
是冬駐蹕黑河平淀

十八年春正月乙酉朔宴于宮中不受賀己亥觀燈于
市以銀百兩市酒命羣臣亦市酒縱飲三夕二月乙卯

幸五坊使霞實里家宴飲達旦三月甲申如潢河乙酉
獲駕鵝祭天地造大酒器刻爲鹿文名曰鹿甕貯酒以
祭天庚戌殺鶻人胡特魯近侍化葛及監囚海里仍判
海里之尸夏四月癸丑殺彘人抄里只已巳詔左右從
班有材器幹局者不次擢用老耄者增俸以休于家五
月丁亥重五以被酒不受賀壬辰獲鵝于迷古水野飲
終夜丁酉與政事令蕭排押南京留守高勳太師昭古
劉承訓等酣飲連日夜已亥殺鹿人頗德騰哥陶瑰札
不哥蘇古涅離保彌古特敵荅等六月丙辰殺彘人屯
奴已未爲殿前都點檢夷騰葛置神帳曲赦京畿囚甲

戊撻烈於鵬窠中得牝犬來進是夏清暑褭潭秋七月
辛丑漢主承鈞殂子繼元立來告遣使弔祭九月戊子
殺詳穩八剌拽刺痕篤等四人己丑登小山祭天地戊
戌知宋欲襲河東諭西南面都統南院大王撻烈豫爲
之備己亥獵熊以喚鹿人鋪姑并掖庭戶賜夷臘葛甲
辰以夷臘葛兼政事令仍以黑山東抹真之地數十里
賜之以女瓌爲近侍女直詳穩憂陌爲本部夷离董是
秋獵于西京諸山冬十月辛亥朔宋圍太原詔撻烈爲
兵馬總管發諸道兵救之十一月癸卯冬至被酒不受
賀十二月丁丑殺酒人搭烈葛是冬駐蹕黑山東川

十九年春正月己卯朔宴宮中不受賀己丑立春被酒
命殿前都點檢夷鵬葛代行擊土牛禮甲午與羣臣爲
葉格戲戊戌醉中驟加左右官乙巳詔太尉化哥曰朕
醉中處事有乖無得曲從酒解可覆奏自立春飲至月
終不聽政三月甲寅漢劉繼元嗣立遣使乞封冊辛酉
遣韓知範冊爲皇帝癸亥殺前導未及益刺劉其屍棄
之甲子漢遣使進白鹿己巳如懷州獵獲熊歡飲方醉
馳還行宮是夜近侍小哥盪人花哥庖人辛古等六人
反帝遇弒年三十九廟號穆宗後附葬懷陵重熙二十
一年諡曰孝安敬正皇帝

贊曰穆宗在位十八年知女巫妖妄見誅諭臣下濫刑
切諫非不明也而荒耽于酒畋獵無厭偵鵝失期加炮
烙鐵梳之刑獲鴨甚歡除鷹坊刺面之令賞罰無章朝
政不視而嗜殺不已變起肘腋宜哉

遼史卷七終

遼史卷八

本紀第八

元開府儀同三司上柱國前中書右丞相兼修國史都總裁脫脫修
皇明奉訓大夫右春坊右諭德兼翰林院侍講署國子監事臣沈淮等
奉

勅重校刊

景宗一

景宗孝成康靖皇帝諱賢字賢寧小字明辰世宗皇帝
第二子母曰懷節皇后蕭氏察割之亂帝甫四歲穆宗
卽位養未興宮旣長穆宗酗酒怠政帝一日與韓匡嗣
語及時事耶律賢適止之帝悟不復言應曆十九年二

月戊辰入見穆宗曰吾兒已成人可付以政己巳穆宗
遇弒帝率飛龍使女里侍中蕭思溫南院樞密使高勳
率甲騎千人馳赴黎明至行在哭之慟羣臣勸進遂卽
皇帝位於樞前百官上尊號曰天贊皇帝大赦改元保
寧以殿前都點檢耶律夷臘右皮室詳穩蕭烏里只宿
衛不嚴斬之三月丙戌入上京以蕭思溫爲北院樞密
使太平王罽撒葛亡入沙沱己丑夷離畢粘木袞以陰
附罽撒葛伏誅癸巳罽撒葛入朝甲午以北院樞密使
蕭思溫兼北府宰相己亥南院樞密使高勳封秦王夏
四月戊申朔進封太平王罽撒葛爲齊王改封趙王喜

隱爲宋王封隆先爲平王稍爲吳王道隱爲蜀王必攝
爲越王敵烈爲冀王宛爲衛王五月戊寅立貴妃蕭氏
爲皇后丙申朔射柳祈雨有司請以帝生日爲天清節
從之壬寅漢遣李匡弼劉繼文李元素來賀冬十月東
幸裏潭十一月甲辰朔行柴冊禮祠木葉山駐蹕鶴谷
乙巳蕭思溫封魏王北院大王屋質加于越

二年春正月丁未如潢河夏四月幸東京致奠于讓國
皇帝及世宗廟五月癸丑西幸乙卯次盤道嶺盜殺比
院樞密使蕭思溫六月還上京秋七月以右皮室詳穩
賢適爲北院樞密使九月辛丑得國舅蕭海只及海里

殺蕭思溫狀皆伏誅流其弟神觀于黃龍府十二月庚午漢遣使來貢

三年春正月甲寅右夷離畢奚底遣人獻敵烈俘詔賜有功將士庚申置登聞鼓院辛酉南京統軍使魏國公韓匡美封鄴王二月癸酉東幸壬午遣鐸遏使阿薩蘭回鶻已丑以青牛白馬祭天地三月丁未以飛龍使女里爲契丹行宮都部署夏四月丁卯世宗妃啜里及蒲哥厭魅賜死已卯祠木葉山行再生禮丙戌至自東幸戊子蕭神觀伏誅六月丙子漢遣使問起居自是繼月而至丁丑回鶻遣使來貢秋七月辛丑以北院樞密使

賢適爲西北路招討使八月甲戌如秋山辛卯祭皇兄吼墓追冊爲皇太子諡莊聖九月乙巳賜傅父侍中達里迭太保楚補太保婆兒保母回室押雅等戶口牛羊有差又以潛邸給使者爲撻馬部置官王之壬子幸歸化州甲寅如南京冬十月巳巳以黑白羊祀神癸未漢遣使來貢丙戌鼻骨德吐谷渾來貢十一月庚子臚胸河于越延尼里等率戶四百五十來附乞隸宮籍詔留其戶分隸敦睦積慶永興三宮優賜遣之十二月癸酉以青牛白馬祭天地巳丑皇子隆緒生是冬駐蹕金川四年春二月癸亥漢以皇子生遣使來賀閏月戊申齊

王罽撒葛薨三月庚申朔追冊爲皇太叔夏四月庚寅朔追封蕭思溫爲楚國王是夏駐蹕冰井秋七月如雲州丁丑鼻骨德來貢冬十月丁亥朔如南京十二月甲午詔內外官上封事

五年春正月甲子愴隱休哥伐党項破之以俘獲之數來上漢遣使來貢庚午御五鳳樓觀燈二月丁亥近侍實魯里誤觸神纛法論死杖釋之壬辰越王必攝獻党項俘獲之數戊申以青牛白馬祭天地辛亥幸新城三月乙卯朔復幸新城追封皇后祖胡毋里爲韓王贈伯胡魯古兼政事令尼古只兼侍中夏四月丙申白氣晝

見五月癸亥于越屋質薨輟朝三日辛未女直侵邊殺都監達里迭拽刺幹里魯驅掠邊民牛馬己卯阿薩蘭回鶻來貢六月庚寅女直宰相及夷离董來朝丙申漢遣人以宋事來告秋七月庚辰以保大軍節度使耶律斜里底爲中臺省左相是月駐蹕燕子城九月壬子鼻骨德部長曷魯撻覽來貢冬十月丁酉如南京十一月辛亥朔始獲應曆逾黨近侍小哥花哥辛古等誅之十二月戊戌漢將改元遣使稟命是月如歸化州

六年春正月癸未幸南京三月宋遣使請和以涿州刺史耶律昌朮加侍中與宋議和夏四月宋王喜隱坐謀

反廢秋七月丁未朔閣門使酌古加檢校太尉兼御史大夫男海里以告喜隱事遙授隴州防禦使庚申獵于平地松林冬十月乙亥朔還上京十二月戊子以沙門昭敏爲三京諸道僧尼都總管加兼侍中

七年春正月甲戌朔宋遣使來賀壬寅望祠木葉山二月癸亥漢鴈門節度使劉繼文來朝貢方物丙寅以青牛白馬祭天地三月壬午耶律速撒等獻党項俘分賜羣臣夏四月遣郎君矧思使宋己酉祠木葉山辛亥射柳祈雨如頻蹕淀清暑五月丙戌祭神姑秋七月黃龍府衛將燕頗殺都監張琚以叛遣敞史耶律曷里必討

之九月敗燕頗於治河遣其弟安搏追之燕頗走保兀惹城安搏乃還以餘黨千餘戶城通州是秋至自頻蹕淀冬十月釣魚土河

八年春正月癸酉宋遣使來聘二月壬寅諭史館學士書皇后言亦稱朕暨予著爲定式三月辛未遣五使廉問四方鰥寡孤獨及貧乏失職者賑之夏六月以西南面招討使耶律斜軫爲北院大王秋七月丙寅朔寧王只沒妻安只伏誅只沒高勳等除名辛未宋遣使來賀天清節八月癸卯漢遣使言天清節設無遮會飯僧祝釐丁未如秋山己酉漢以宋事來告是月女直侵貴德

遼史卷九
州東境九月己巳謁懷陵辛未東京統軍使察鄰詳穩
涸奏女直襲歸州五寨剽掠而去乙亥鼻骨德來貢壬
午漢爲宋人所侵遣使求援命南府宰相耶律沙冀王
敵烈赴之戊子漢以宋師壓境遣駙馬都尉盧俊來告
冬十月辛丑漢以遼師退宋軍來謝十一月丙子宋主
匡胤殂其弟昞自立遣使來告辛卯遣郎君王六撻馬
涅木古等使宋弔慰十二月壬寅遣蕭只古馬哲賀宋
卽位丁未漢以宋軍復至掠其軍儲來告且乞賜糧爲
助戊午詔南京復禮部貢院是月轄戛斯國遣使來貢
遼史卷之八終

遼史卷九

本紀第九

元開府儀同三司上柱國前中書右丞相兼修國史都總裁脫脫修
皇明奉訓大夫右春坊右諭德兼翰林院侍講署國子監事臣沈灌等
奉

勅重校刊

景宗二

九年春正月丙寅女直遣使來貢二月庚子宋遣使致
其先帝遺物甲寅以青牛白馬祭天地三月癸亥耶律
沙敵烈獻援漢之役所獲宋俘戊辰詔以粟二十萬斛
助漢五月庚午漢遣使來謝且以宋事來告己丑女直

二十一人來請宰相夷離董之職以次授之六月丙辰以宋王喜隱爲西南面招討使秋七月庚申朔回鶻遣使來貢甲子宋遣使來聘壬申漢以宋侵來告丙子遣使助漢戰馬八月漢遣使進葡萄酒冬十月甲子耶律沙以党項降酋可醜買友來見賜詔撫諭丁卯以可醜爲司徒買友爲太保各賜物遣之壬申女直遣使來貢乙酉漢復遣使以宋事來告十一月丁亥朔司天奏日當食不虧戊戌吐谷渾叛入太原者四百餘戶索而還之癸卯祠木葉山乙巳遣太保迭烈割等使宋乙卯漢復遣使以宋事來告十二月戊辰獵于近郊以所獲祭

天

十年春正月癸丑如長樂二月庚午阿薩蘭回鶻來貢三月庚寅祭顯陵夏四月丁卯西幸己巳女直遣使來貢五月癸卯賜女里死遣人誅高勳等六月己未駐蹕泂柳湖秋七月庚戌享太祖廟九月癸未平王隆先子陳哥謀害其父車裂以徇是冬駐蹕金川

乾亨元年春正月乙酉遣撻馬長壽使宋問興師伐劉繼元之故丙申長壽還言河東逆命所當問罪若北朝不援和約如舊不然則戰二月丁卯漢以宋兵壓境遣使乞援詔南府宰相耶律沙爲都統冀王敵烈爲監軍

赴之又命南院大王斜軫以所部從樞密副使抹只督
之三月辛巳速撒遣人以別部化哥等降納之丙戌漢
遣使謝撫諭軍民詔北院大王奚底乙室王撒合等以
兵戍燕巳丑漢復告宋兵入境詔左千牛衛大將軍韓
侖大同軍節度使耶律善補以本路兵南援辛卯女直
遣使來貢丁酉耶律沙等與宋戰於白馬嶺不利冀王
敵烈及突呂不部節度使都敏黃皮室詳穩唐筈皆死
之士卒死傷甚衆夏四月辛亥漢以行軍事宜來奏盧
俊自代州馳狀告急辛酉敵烈來貢五月巳卯宋兵至
河東漢與戰不利劉繼文盧俊來奔六月劉繼文降宋

漢亡甲子封劉繼文爲彭城郡王盧俊同政事門下平
章事宋主來侵丁卯北院大王奚底統軍使蕭討古乙
室王撒合擊之戰于沙河失利巳巳宋主圍南京丁丑
詔諭耶律沙及奚底討古等軍中事宜秋七月癸未沙
等及宋兵戰于高梁河少却休哥斜軫橫擊大敗之宋
主僅以身免至涿州竊乘驢車遁去甲申擊宋餘軍所
殺甚衆獲兵仗器甲符印糧饋貨幣不可勝計辛丑耶
律沙遣人上俘獲以權知南京留守事韓德讓權南京
馬步軍都指揮使耶律學古知三司事劉弘皆能安人
心捍城池金賜詔褒獎八月壬子阻卜惕隱曷魯夷离

董阿里覲等來朝乙丑耶律沙等獻俘丙寅以白馬之
役責沙抹只復以走宋主功釋之奚底遇敵而退以劔
背擊之撒合雖却部伍不亂宥之冀王敵烈麾下先遁
者斬之都監以下杖之壬申宴沙抹只等將校賜物有
差九月己卯燕王韓匡嗣爲都統南府宰相耶律沙爲
監軍惕隱休哥南院大王斜軫權奚王抹只等各率所
部兵南伐仍命大同軍節度使善補領山西兵分道以
進冬十月乙丑韓匡嗣與宋兵戰於滿城敗績辛未太
保矧思與宋兵戰於火山敗之乙亥詔數韓匡嗣五罪
赦之十一月戊寅宴賞休哥及有功將校乙未南院樞

密使兼政事令郭襲上書諫畋獵嘉納之辛丑冬至赦
改元乾亨十二月乙卯燕王韓匡嗣遙授晉昌軍節度
使降封秦王壬戌蜀王道隱南京留守徙封荆王是冬
駐蹕南京

二年春正月丙子朔封皇子隆緒爲梁王隆慶爲恒王
丁亥以惕隱休哥爲北院大王前樞密使賢適封西平
郡王二月戊辰如清河三月丁亥西南面招討副使耶
律王六太尉化哥遣人獻党項俘閏月庚午有鵝飛止
御帳獲以祭天夏四月庚辰祈雨戊子清暑燕子城五
月雷火乾陵松六月己亥喜隱復謀反囚于祖州秋七

月戊午王六等獻党項俘八月戊戌東幸冬十月辛未朔命巫者祠天地及兵神辛巳將南伐祭旗鼓癸未次南京丁亥獲敵人射鬼箭庚寅次固安以青牛白馬祭天地巳亥圍瓦橋關十一月庚子朔宋兵夜襲營突呂不部節度使蕭幹及四捷軍詳穩耶律痕德戰却之壬寅休哥敗宋兵於瓦橋東守將張師引兵出戰休哥奮擊敗之戊申宋兵陣於水南休哥涉水擊破之追至莫州殺傷甚衆巳酉宋兵復來擊之殆盡丙辰班師乙丑還次南京十二月庚午朔休哥拜于越大饗軍士三年春二月丙子東幸巳丑復幸南京三月乙卯皇子

韓八卒辛酉葬潢土二河之間置永州以秦王韓匡嗣爲西南面招討使五月丙午上京漢軍亂劫立喜隱不克僞立其子留禮壽上京留守除室擒之秋七月甲子留禮壽伏誅冬十月如蒲瑰坡十一月辛亥加除室同政事門下平章事是月以南院樞密使郭襲爲武定軍節度使十二月以遼興軍節度使韓德讓爲南院樞密使

四年春正月巳亥如華林天柱三月乙未清明與諸王大臣較射宴飲夏四月自將南伐至滿城戰不利守太尉奚瓦里中流矢死統軍使善補爲伏兵所圍樞密使

斜軫救免詔以失備杖之五月班師清暑燕子城秋七月壬辰遣使賜喜隱死八月如西京九月庚子幸雲州甲辰獵于祥古山帝不豫壬子次焦山崩於行在年三十五在位十三年遺詔梁王隆緒嗣位軍國大事聽皇后命統和元年正月壬戌上尊諡孝成皇帝廟號景宗重熙二十一年加諡孝成康靖皇帝

贊曰遼興六十餘年神冊會同之間日不暇給天祿應曆之君不令其終保寧而來人人望治以景宗之資任人不疑信賞必罰若可與有爲也而竭國之力以助河東破軍殺將無救滅亡雖一取償於宋得不償失知匡

嗣之罪數而不罰善郭襲之諫納而不用沙門昭敏以左道亂德寵以侍中不亦惑乎

遼史書卷之九終

遼史書卷之九終

遼史書卷之九終

遼史書卷之九終

